

武寧縣志卷之四十一

藝文詩

古體

讀鮑馬二公傳

舉人 查振旗 星子

訪舊司訓齋巋然見楮扁司訓署即鮑公祠楮扁山高水長四字仰止鮑公祠

流觀邑乘卷豫寧匪睢陽鮑馬如巡遠巡遠遘時危兩公績

何顯憶昔白巾寇蔓滋未渠剪瓜源氛已惡龍腹更蹂踐鮑

公振臂呼精銳出疆畎耰鋤制鉤戟瞻顧議不反霖雨洗妖

纏羣兇一朝殄書生親枹鼓何以諳驅遣山農立戰功此事

從來鮮雖資賞罰明良由撫字善馬公尤奮勇衝突力先勉

部卒一當千主將謀非淺令各圖自全未必以身免在和

不 在眾真武始能偃同此蕩寇功奏最惟鮑選竹帛光功名山



水綿祀典歎古丈夫懷半以艱虞展寂寂東郊墓斷碣封苔

蘇馬公墓在東關外

棠城別墅

陳芬韻谷

中谷有廬環以修竹客至忘言清風一曲
貧不及炊名不及錄遠彼風塵蕭蕭自足

庚辰仲冬重遊仙姑寺

張問達

偶然續舊遊視聽迥非昔古寺依然存舊句不得覓千岫吐
遠藍參差倚空壁晴烟覆其腴淡水蕩其膝幽晦幾千年今
茲乃歷歷萬象森目中清曠從所適白雲數縷生乃在東岵
側隨岵遂窅冥井泉何汨汨搗藥人未還惆悵日已夕

冬至後六日登雞籠山絕頂

不窮雞山巔不測雞山尾羣巒隱山陰森秀乃如此盤鬱疑
流雲迅速驚風雨駿馬下危坡神龍攫天市空際蕩波瀾足
底簇蓮蕊高低遠近間纖悉在顧指會聞魚腹中八陣孕奇
詭造物自聰明變滅何生死赧燭天之外鳥鳴山之裡幽元
啟秘鑰低徊曷能已遲遲返寺門傾壺憩遊履心醉後山峰
目送前江水

竈石紀遊

歲貢李趣堂子秋

人間遺此武陵源咫尺層山開洞天居人好事稱天竈呼吸
之間通雲烟我來結隣山之半泉頭石脚相縈旋却從間道
尋山腋倏張山骨回肘有一石銳頂疑覆釜雙岵餓腹如側
船忽然天光何處漏石蓋應笑山磨穿只今巖脊留危竇引
入青藤都倒懸更有層巘不可卽紆磴左繞鍊橋巔別關門
戶旋生面中通一線如鉤連傳說其間較幽邃秉燭莫或窮

其根始信造物能好怪崆峒每費神工鑄我自羈遼山水約
魯溪暇洞遲十年西來何意復有此靈山無乃留前緣道華
一棗今安有契虛三彭漫欲聯明日會邀諸同事一掃塵襟
談妙元

魯溪洞紀遊

夏光芹 醜郎

昔聞魯溪洞洞內有神仙重門秘奇怪一一出天然龍潭無
底處相戒不可前而我攀磳隘舉火窮幽元須臾出一老眉
龐髮秀娟相問無名姓時復叙其緣我本此溪主長飲此溪
泉謝絕人間世悠悠隔山川君志非巖壑豈爲白雲牽去去
勿復問看我石上眠倏忽不相見同人俟遠阡回視洞門裏
漠漠鎖寒烟

魯溪洞放歌

邑貢余 璞 暮淵

不信桃源別有家仙源多被白雲遮我來魯溪三月候乍見
魯溪桃正花取次沿溪穿石磴豁開洞門舒天葩奇形怪狀
描摹拙鬼斧神工追琢嘉玲瓏皺瘦嵌離陸鐘鼓鉦析撞鎗
綉上樓下閣納烟霧左旗右旆張霓霞螭舫無人繫撓楫窟
室有徑鏈幽遐然火相照燄不烈微燈一點光無加蝙蝠翩
翻趁人撲石燕翱翔紛騰拏數頃荒塍列參錯一局殘枰劃
欹斜同人導我過溪北別有高臺上平沙聳身援坡歷險巖
斗口穿洞窺深涯瑰驚魄悸不敢望伏身探頭禁無譁至此
已極窮其奧有誰更復浮仙楂龍湫黑漆不見底仙源斷岍
徒吁嗟嗟哉造物肆奇喬此泉此源誰疏爬獨惜僻在山之
隩可憐寂處人無誇余亦浮生同潦倒魯溪魯溪何窳窳

飲馬岡行

邑庠 張向辰 接三

將軍岳氏真神武能使悍賊寢強虜功垂汗馬十餘年誓爲
宋室恢疆土紹興之中舉甲兵直趨洞庭震金鼓車騎所向
無不利馳驟會過海昏地熊羆將士歡聲騰青驄白駱多騏
驎將軍英氣滿須眉行向高岡同執轡巖泉萬丈掛山頭一
飲聊佐芻菱備吁嗟名山巨壑何綿綿詩人韻士空流連奚
似將軍一駐足此地終古人爭傳君不見水聲常作怒濤沸
嗚咽猶含壯士氣烟雲渺渺樹依依千載忠魂長歎歎

伊洞龍鱖

潘崇文

伊山繚以曲伊水深且幽中有候時魚錫名曰龍鱖龍頭而
對角乘夏常出遊蟬聯歲三日湧赴大江流跋浪占雷雨衆
多知時休化生與卵育邈莫知其由如何他源內絕無其匹
儔邈來竟簡出溪影日悠悠

柳山佛巖

黃邦彥 菊里

笑兀啟雙門蘿徑攀險歷鬼斧鑿其幽怪穴恣搜剔老苔無
古今寒光翠欲滴不必叩禪扃萬緣已俱寂貞公何處踪清
風生石壁

斷穀山

在曲池書院北客
死者多葬於此

張錫芻郊

層巘排空來斷峰如尺穀林還一徑長游塵蹴遠目苔石自
在春楊葉向人綠飢鴻路頭啄颺颺草根宿百尺蒼藤陰其
下有鬼哭傷哉行路人誰問其骨肉一碣寄山僧游魂依野
木樛酒東風莫如聞哀躑躅落日溪水流愁雲黯空谷

赤連舉數女有進溺女說者詩以謝之 李 赤 岸秋

天地自茫茫古今非仄仄荷無好生心何以有顏色草木一
氣中等閒愛培植况爲萬物靈尤盡關天德生男雖云美生

女豈中忒卓哉賈生行使我心中惻
邵人愛箕裘育弟不育姊鄭侯如不來邵人從茲止鳴鳳自
有鳳羲皇自有母六陰而九陽造物固如此丈夫苟不才巾
幘猶知恥所以父子親漢意乃不死

十姑詩

石璜梅郵

十姑者頭陀石有義次女也甫字其夫遂亡矢志不
嫁終節母家年六十有奇

昨夜月尚盈今宵月已缺月缺有時盈妾身已望絕半面未
曾謀倏忽傷永訣撫懷其如何對影空嗚咽憤不惜餘生此
心疇與雪願以義命安清操勵苦節

烈女吟

東渡石文鳳次女成妹因誤許僕隸旋覺父母欲另

配女憤甚潛赴水死

修江之水清且潔東渡迴流不忍說前有戴婦昭盟詞後有
成姑著奇節元明遞歷幾春秋後先相望同一轍景行苦况
竟如何只爲媒氏誣搖舌僕隸許諧秦晉權厥父聞之義欲
絕義絕義絕誠所宜節孝兩全仗何策跪泣低徊已斷腸敢
云保身當明哲語畢遯跡不回頭一片冰心明澤國

幹山雜詠

邑庠李修字山

白雲終日隱衆山何蒼茫獨標千古幹百尺插天闔幹山
岬壁不可平山鳥鳴砒砒溪水穿石流孤雲連洞沒幹溪洞
當年嶺上亭白雲爲肺腑仙人去未歸竟與衆山伍亭子嶺
溪水何淙淙中有雙赤鯉揚沙遂成洲大風吹不起大沙洲
仙水關石門重重自盤固啟閉惟白雲古今深守護石門

密峰百丈崕清泉空傾瀉我欲叩禪扃誰復波羅者密峯
峭壁懸千仞瀑水瀉高岡雲封石髮古中有蛟龍藏石壁洞
天風何許狂仙梯落崕巷艱難不可躋獨有雲升降石梯

遊羅巖

盛 芾 昱峯

幽巖生白雲朝夕泛山麓我乘春風來路盤通隈隩然火入
石門繞光飛蝙蝠一澗流寒泉無風波自伏青蓮掛高閣三
五看不足微磴陟雲田玉液斷復續不涸亦不盈時有苔痕
綠逕步度短橋皚皚琅玕轟石壁橫素琴彈我太古曲旁有
長生書摩甍不可讀太息緘經人深心將誰屬往復烟雲中
幾回勞躑躅吾亦謝之去長嘯出空谷

冰文岩

盛 軌 子石

靈岩靄白雲石魚從之起風雨時往還寒光流不已鬼斧闢
何年無乃造物詭

流月池

流月從天瀉苔痕蕩虛碧偶然秋風吹寒光生石隙孤負山
中輝不照山外客

神童山

國學 李之華

猶是山連巨幽趣大都同如何開生面嘗駐高人踪宋代周
先生生性直其聰當年吟咏處一碧挿盤東我嘗登其表縱
日向高空修水流一綫山城明幾重故基杳何所古廟棲蒙
茸人傳地亦屬千載名神童

題劉明府桂亭先生勸農圖

邑舉 余 虹 承露

我聞善政譁幽風于耜舉趾勸課農古來田畯專厥功後世
此事將無庸桂亭明府何從容四月累日切深衷布穀聲聲

水溶溶鞍馬翩翩出郊東綠楊道上田舍翁秧馬倥傯牛背
童蠶婦提筐出桑中一時觀者萃如蜂花酒殷勤興具濃紫
陌紅疇瞻化工何期再見蜀文公士民之樂樂無窮寫生妙
手關荆同披來一幅琴堂中猗與休哉時方雍

節婦余盧氏

邑令尹作翰

生不遽死苦成節死不願生慘成烈節烈二者自古難於茲
兼之乃卓絕盧家女瑤池雪少小入余門星影銀河徹卅載
喪其夫丹鳳分飛鸞鏡缺草不宜男憂心極蟲鮮蟻蛤望竟
絕麻裙裹土築孤墳青山啼遍杜鵑血墓田數頃種梅花貞
魂稿袂標孤潔年年寒食辦香爇修江之水聲嗚咽

伊山

陳簡翼渠

我昔懷幽想欲買柴桑田追踪五柳宅把釣步斜川及今歷
伊谷耳目疑遊仙羣峰自揖讓一水復迴旋斷畦叢古木曲
磴隱炊烟翠竹暗谿徑天桃紅澗泉相引入深處頓令俗塵
捐何時從夙願結屋來山巔

伊叟墓

潘濤

伊水深蟠屈山巒互吐吞古木護高塚下有避秦人養龍入
石湫性習龍狎馴道適以時舍相與爲潛鱗去世身寂寞蛻
解何故親龍兮果誰本徘徊失其羣一夜封馬鬣雷雨猶愴
神茅舍今不遠石湫無問津鋤花空對月種竹自爲鄰慨然
懷曠世疇復識其真

喜雨亭

監生李之純雅齋

城陰橫玉枕上有喜雨亭盛侯昔遊讌甘霖沛郊坰誠禱天
降康可以樂嘉賓茲夏頗苦旱野草漸無青擊鼓喧日夜瘞

玉勞公庭仰視河漢流耿耿惟繁星亭中人已往誰爲叩山
靈

遊魯溪洞

余 珽 枕南

山峨峨石齒齒羊腸路險行且止千山萬壑盤復盤古洞不
知何處是溪邊竚立聞牧童牧童遙指蒼烟裡一徑紆迴螺
壳轉怪石嵯峨排近遠水田漠漠漾清泉棋局蒼蒼羅碧蘚
龍潭水深不可測俯視瀾茫滋惶惑安得海門分水犀引我
探盡龍巢與蛟室

玉清宮偕友人方春湖偶眺

歲貢 張曾勳 巨虹

鐘磬生夕陰層巒度清響林鳥各安息邀我坐軒楹茫茫磊
思巢本爲昔賢賞欲尋舊時迹幽人曰旣往劍石化空蒙丹
池何泱泱呂仙已杳春深苔痕長相與出庭隅上下同延

望流月水聲清鐘鼎雲氣晃翹首望高峰牽衣躡屐上

南山古松歌贈同樹張人峯

邑監 盛 滋 更生

南山有古松結根在崕千夏日不畏酷冬日不畏寒上有青
雲摩其頂下有白雲養其根亭亭孤立幾千載中有白鶴巢
其間夜來風月相回互古幹盤踞未可攀世人選往忌其才
我獨低徊抱永嘆吁嗟彼蒼胡不仁使女抑鬱困頓不得伸
我欲求之不憚遠但願與女共盤桓朝則觀鶴舞夜則和雲
眠悠游物我外不復問歲年

題羅節婦季子職員張作舟像讚

邑令 尹作翰 湘潭

伊何人節婦子甫月餘父沒齒呱呱啼母噓唏漸長成兄友
弟伯氏謀衣食仲氏教經史心性啟光明行踪羞譎詭交遊
崇師儒家居飭倫紀後先荆樹凋撫姪愛不弛範之以馳驅

康莊循正軌素心時涕垂爲我言其似爰握筆傳其是修水
流柳山峙

烈母陳方氏

新喻 張懋芝

輕塵棲草間爲時曾有幾古來賢達誤所欠惟一死一息尙
存千載鄙錦衣玉食徒爲爾嘖嘖方氏女激烈踰國士古聞
同穴詩今世誰儀此吁嗟人命不可長咫尺冥冥泉路黃悲
風號木天雨霜魂夢周旋那可得忍使終身稱未亡松柏旣
摧折女蘿終斷絕割鼻猶聞污蠟說百年身事一朝決義重
如山心若鐵夜臺仍似髮初結隣里驚號烈婦烈吁嗟烈婦
身死名猶芳安得大書明表達路旁使夫道旁觀者對之慚
且傷

車孝子詩

張望

豪傑科舉吾由駕凡夫局促轅下詫世運略不肯雷同千年
以來有變化問賢良於臚仕中高閣六籍諷晨夜山齋有窮
耕蘆人一個未識宏靖呵事親生死古記符和孺晶晶文章
伯此事天下降落然始皇焚書看世破坎際傳子懽孝誠踏
門以猶有人賀五里十里不聞名采風者何從偵邏久拌喬
木家園材無花無果留佇坐不以往訪好事稱聽此如欲麻
喙臥孝子擁篲遲悲谷明日提鷄走腰髻下首高尻嫌鯁愚
問而知之赧且訝老遊不盡天一涯必有斯人藏巖罅及我
無能振高風乃爲櫟樟干雲傍

偕邱山人程萬登金雞山

邑庠 余振鐸 東魯

金雞山高高不已峭壁摩天石磊磊仰矚屢屨帽欲落樵人
喘息山腰裡予與諸君同巖屨扳籐捫石搜奇瑰蠟屐孑孑

不得上五步十步未尺咫先生浩氣獨殷冲舉足翩然若遇
風獨立崔巍舒長嘯山谷爭應鳴洪鐘自是君身有仙骨用
句登臨何處不從容我到山頭還徙倚先生指點形家理最
愛身從高處來放開眼界幾千里手摩蒼穹弄日月一腔塵
俗片時洗俯仰移時日漸低日下嘹唳鴈南飛取道更從清
曠處千山控立人歸去

游柳山感賦

邑庠 生 余復 半鱗

柳峰峭削如文筆直入青雲摩白日仙人

崖名 丈人 峰名 拜下風

遙與芙蓉

匡廬峰名

東西立柳公當日尋幽棲誅茅結屋山之腋

山容自此一更新千載游人仰高潔我懷此山已數秋今春
躡屐窮凹凸山林泉石尙依然墨沼書臺空殘碣自來名勝
概如斯天人理數真難說湧翠亭中借酒杯澆殘壘塊心悽

絕山鳥啞啞古樹鳴岫雲冉冉漫山缺徘徊山下獨放歌古
道寒陰浮暮色

拜冷氏三忠祠

盛 暉

自來忠貞長不沒此祠至今祀三賢一爲宣和之進士氏冷
諱洙字晦源學問該博復強敏重任可勝智勇全卒爲中貴
所深沮尋罷歸來處林泉紹興之閒國多故成賊蹂躪寇我
武將軍岳公久知公檄公區畫守此土爰繕器械及甲冑日
夜經營整儔侶大戰印斗 港名 大敗績寇兵益烈勢如虎追公
圍公殷土橋復戰不克心自主隻身強著短後衣冒矢突圍
力與拒大呼殺賊氣已盡卒慘書生死行伍復有應元字英
叔少隨父任宦容洲父貧卒署不能返涕泣扶杖不勝憂歲
餘父襁纔歸道道路哀之稱曰孝未幾歷官擢提刑適當國

危多不肖痛哭募兵勤王事沈忍毅謀舉其要孰知步將梁
與徐陰約迎降交相嘯危城已破身被執惟志不奪無敢誚
敵復動之以崇爵大罵不顧心不搖將有所圖終罔濟不食
而死亦含笑厥後又有諱凱者字曰才夫號龍崖名厠咸淳
之貢士危言危行俗不諧讀書隱居鹿洞地深得誠明之旨
祕蒿然忠義忱時艱累徵不起各有志不平則鳴輒悲歌聊
將著作舒胸次哀然十卷著有龍崖集十卷都失傳徒令口碑垂奕
世先年祠祀此三公家國表揚心俱同春秋俎豆隆妥侑忠
肝義膽弔芳蹤我來拜跪檐楹下遺風懍懍騰清空安得廟
貌時修葺長留正氣塞蒼穹

車水謠

高懿 石村

桔槔鳴不已車落山頭日日落黑雲興雲散月復出月出光

漫漫車頭水農夫汗

雞已鳴溪已竭枯苗有露暑氣微兩岸轆轤聲轉疾老翁力
衰不能前荷鋤獨向田中立四方星稀天欲旦城樓夜會歌
始散

喜雨

嘉慶甲戌禱隱峯洞石鑊潭之觀音泉

邑庠生 葉 杭 葦舟

石鑊潭清且深隱峯洞崑叢陰傍有層巒轟如戟紫煙縹緲

紛朝夕相傳仙人踞其顛洞內山名堆螺擁翠繞洞前洞名

螺古像懸崖數百載明成化十一年刊白衣大士像於崖之上今猶新恍忽普陀鎮

滄海時維甲戌六月中虐遭旱魃顛蒼穹烈炬高懸日復日

泥首慈雲屈千膝孟蘭心仰容安安旃檀烟幻霧漫漫隱然

霄漢藏風力瞥爾濕雲遮日色呼聲鼓聲相爲儔雷聲雨聲

不肯休膏澤足田疇綠餘菽粟歡嗣續若濟大旱神之靈潛

虬豈必燒燕腥吁嗟乎宣布愷澤神之靈長誦觀音般若經

遊蟠龍寺三十韻

邑庠王勳

蟠龍之山何嵯嶢千盤轉盡勢迢迢深林忽傳鐘磬響中有
一刹藏其凹混沌鑿開真宰出乾戶陡闢坤軸搖羣峰園拱
若培塿剝旋蜿蜒紛來朝時有白雲覆寺頂網緼杳靄滿山
腰欲吐欲吞狀豁閭或濃或淡抹林梢干松紛拏偃強鬪天
晴風雨亦瀟瀟甲蠶森張爭奮舞浩漾渟渟湧奔潮平生頗
志遊五岳牢籠名勝貯詩瓢脚根軒軒同霞舉矯首日月直
可招渴來翻倒三漿盆洪崖拍肩子晉邀更欲乞取安期棗
選音靜奏秦史簫雲夢胸吞不芥蒂目空九土天寥寥俯視
塵世蟻蠅耳安問何人珥漢貂夔屈里中苦局促茲遊一使
眼界超野花競發紅爛漫行行緩度望仙橋昔日仙人已不
見放歌時逢谷口樵爲窮幽勝徑疑絕竟令神魂俱飄飄山
颺吹骨骨欲振長歌問天無乃驕但見寺前有古柏亭亭直
上干雲霄佳本移來幾歲月飽歷冰霜老不凋孤如挂天擘
雲鷲矯如摯鳥搏空鵬依依老佛堦前立居然特出挺孤標
又聞寺後泉挂壁冷然仙樂奏雲韶蒸霧喻日浮元氣銀漢
一線瀉生綃觸磴寒流懸玉乳霏霏錯落散瓊瑤山僧汲水
煮山茗自言山中春味饒我感山僧愛客意數甌白雪洗煩
囂不覺兩腋清風滿廣漠大塊任逍遙便起蟠龍乘雲氣相
與直上天門跳

石鑊洞仙泉歌

邑貢翁藻 稼江

古艾南巖陽麓有石如鑊藏幽谷形連丹竈鎖煙青中湧涓
流釀新綠不汎不涸淨纖塵豈羨飛崖掛懸瀑旱魃爲灾祈

禱神雨隨車至新膏沐邦民忻感石泐銘擘窠巨字生鉅鏤
勝蹟饒傳濟物功尊者當年制龍壽

鶴樓八景

邑廩王佐別墅

衆鳥鳴朝暉彩雲滃山谷似欲從龍飛誰作錦裳服偶過樵
父肩挑來不成幅蜂嶺晴雲

悠悠出三源地皴得一奩綠都被軟絲牽波紋密與續有客

破溪烟依稀滄遠矚柳溪春水

殘月寶坊清淡烟空林寂不見刹中人但聞聲奮激豈是景

陽宮祇爲催妝擊烟寺曉鐘

一輪秋月明一泓秋水碧玉窟與銀塘相照何清白金氣冷

乾坤那管悲秋客銀塘秋月

瀟灑布清陰左右遮晴日時引薰風來鳳尾諧聲律佳士與

之居涼入讀書室竹園迎風

庭外森古松高秀莫能折上接一峯青任聚連宵雪君子歲

寒心幽人清皎節松林積雪

路險人蹤稀山深樹陰積穿林到樵夫長歌曉烟碧可識婁

妃詩防滑蒼苔石山徑樵歌

春風何處來吹得郊原綠牧笛破烟橫競吹無調曲借問爾

胡然膏雨連村足平疇牧笛

看鶴亭

邑增喻志恢曉堊

曾聞有鳥丁令威託蹤華表成昇飛遼東相去幾千里胡爲

此地垂遺徽山名地名兩相証欲質真情知者稀若言其事

概無信丁仙遺踪指可揮無乃仙人好奇詭往來去住無常

歸亦或丁仙別有主文人傳會多狐疑事越千載成今古看

鶴亭邊誰是非君不見林逋常放鶴孤山高風自落落又不見子晉謝時人鶴影笙聲如有神爲問遼東華表中弔古如何此城東我來看鶴鶴不見歷歷征鴻下遠空

七里山行

邑歲貢 潘運良 植園

萬朶芙蓉凌劍鏑一抹輕烟何秀削峭壁高懸無處行鬼斧神工倩開鑿憶昔石磴荆棘蒙安望徑絕風雲通白日陰幽走厓下鈎輅格磔鳴西東誰何舟行駭奔瀉立志鳩工穿一罅碎石如斗繞江流盡是當年鎚斫下客子行行重行行塵埃忙碌若爲情俯瞰蛟龍爭洞穴腥風毒氣波濤驚古驛雞鳴過者衆青山疊疊如迎送車馬轟騰石有聲踏破閒鷗宿烟夢

上梅崖望雲得雨

郡庠生 夏賢 少非

四望渺無雲一片窓間起轉瞬千九霄濃集千萬里離奇聳殿閣冠冕羅階阨雄風何處來電光靉黳裏磅礚一聲威如傾天河水蒼生望未深安得無量喜

伊叟舊宅

邑貢生 翁蘋 冠江

山巔結草廬隱跡深逃世織屨給饗殮豢龍通智慧兵燹辟秦氛邃密林泉際風月共閒閒閉關心不滯遺址白雲孤峯青人已逝

同友人遊魯溪洞

邑庠生 余翰 馨齋

秋日清輝照下土未許幽棲閉巖戶朋來躡屐魯溪遊勝地文人多踵武空山首見石門開高低崖豎接樓臺鐘鼓神龕懸半壁春水池田長綠苔咫尺龍潭深莫渡欲渡恐有蛟龍怒徘徊洞口澹忘歸野樹凝紅日已暮

茅坪石

湖南候補縣丞翁 蔡

茅坪之山高幾許轟轟去天疑尺五雲氣遙連飛洞峰嵐光映接瓶溪浦山靈毓秀孕清奇雲根幻石如瓊瑰五丁不作祖龍杳老坑深處何人開誰知神物終難秘有美忽向山腰出按劍羣驚席上珍流光似出鮫人室良工追琢同珪璋或為屏硯或界方堅純宛似崑山玉嫩骨猶如塞上霜我聞海嶽庵中客袍笏拜奇石又聞蘇長公東海籠袖中願將此石襲緹錦厥貢惟金同三品

孝井

盛壯

嗟哉此井水甘冽異他處至性所感激神龍亦潛助不然地高亢那得通泉路沸沸而瑩瑩兼可澄操慮我嘗來其上躑躅不能去緬彼當年闢鑿心菽水承歡營冰署功成汲獻清

且漣一勺一瓢深孺慕世兒統袴漫相誇飲酒先生邀浮譽何如青醴分外幽高堂式飲神饜飫惠澤亦復公士民絡繹爭取無朝暮日月晦蝕海亦枯岸石淺缺水陰涸國子先生盛學烹奕世猶能循其步真情所觸將毋同復將智井浚如故

劍石歌

湖北監利縣丞王瑞鼎 主園

修江有劍石兀立蟠溪西相傳仙劍削崩勞難扳擠其上產芝草其下生玻璃在昔黃涪翁過此每羈栖水月雙清字剔蘚崖鱗題釵脚今安在古跡志棗梨我家住南潁盈盈只隔溪南宋以來世復世誰其壽考與茲齊吁嗟乎人生一世苦旁午敢讓江山獨千古

偕盛霞軒遊大源山洞

邑庠張尙銘 熙臺

秋中萬象澄人意與軒豁我友招我遊拄杖詢所適眷言盤
谷好緣磔把臂入延袤三十里吳楚區南北兩峯屹其外指
顧嗟奇絕樂哉洞天幽誰代闢荆棘兩間多異境高深曷窮
極翫翫祇平行胡爲坐太息奧如廓有容徑不礙磴仄比偕
磊落儔意象相得得仰視飛翎高俯聽流泉咽閒雲卷巔末
空翠近欲濕山棚幾人家炊烟補林隙偶然值林叟遽然迎
我揖啜我山閒茶啖我山閒栗坐說年時好四隣沐膏澤疎
籬豆枝紅蘆苞綴玉粒秋崖處處花冷淡傲春色以此緬桃
源因歎身世拙行藏但有時與君各努力巖下香風來今夕
竟何夕笑謝山中人予亦從茲出

巖花岡拜張閩榻先生墓

邑庠 盛化神 兩一

櫻山一布衣墓草已五綠當日蓋棺時萬里來芻束我思古

之人立志潔如玉英華散九垓遺塚委荒麓春日杜鵑啼秋
深暮猿哭悠悠重泉中芳魂獨淵穆

望龍峯

國學 魏之珍 席甫

金城古觀地稱僻亂峯環聳雲抱日觀後有峯號曰龍一尖
插天形似筆絕頂自昔祀龍王噓枯澤朽濟民急旱暵禱雨
雨傾盆神靈半藉山靈力我曾九月躋其巔髮鬢去天不盈
尺一朝廟貌煥然新想像聲靈長拜揖

雲臺石

在江陰鄉山絹源口

韋世楓 拂雲

暮雲不許來朝雲不許到蒼蒼自出雲只許清風掃

古柏行

用杜工部原韻

潘文誦

鳴琴堂前植古柏四百年來固磐石霜雪鍛鍊歲寒心老氣
橫秋高百尺朝罨梢頭雲氣青暮飾葉底月痕白玉枕峯高

有鍾靈人似甘棠相珍惜濃陰覆翠鎖隅東遙看氣燄逼半
宮蟠龍蒼曲自攫拏一掃山林萬木空撐持百里艾子國老
盡春雨復秋風生成原有後彫質不受人間匠斲功乘時自
足作梁棟孤高偃蹇猶見重兩代人民任變遷花晨月夕相
拋送依舊枝葉此青青不巢凡鳥巢靈鳳人生抱質自完全
材大終能歸大用

南皋八景

潘藝蘭

獨步荒山裏荆杞靄雲霧傳是昔時仙爐灶煉丹處羽化今
已遠我來方遲暮深感清淨理清風度林樹雞山仙穩
野老安貧賤世事無一求夜卧東山月日濯高澗流澗水清
且淺小魚時出遊萬物自閒妙造化與沈浮南澗清流
斫石嵌爲塔森聳在深山朝見鳥飛去暮見鳥飛還木石嘗

與俱空山養疎頑太虛本寥廓飛飛者自閒丹霄雁塔

小徑曲折入參差多廬舍雲中雞犬繁屋角桑麻亞兩岸夾

桃花一溪緣源乍桃落復桃開何事騁塵駕桃源春富

結茅臨絕頂林泉生虛籟風吹白雲開天空星辰大摘之欲

懷歸仙子不我賚何當策高足置身遊塵外槎源星近

雲欲與之離石故爲之合石欲與之吐雲故爲之納石與雲

相忘雲與石相狎如劍光出獄如太璞在匣島山雲橫

芄芄叢枝極瑩瑩垂金露好風自東來遙聞天香度昔者有

高人於今尋佳趣景物自依然風徽邈難慕東山瑞桂

西嶺有喬松高與雲霄接孤榦何挺拔旁無他枝葉小草俯

其根顧盼好顏色嚴霜一朝來淒淒衆芳歇西嶺喬松

遊魯溪洞

邑優 余紹曾 香泉
庠生

見說魯溪勝奧窅開洞天有客招邀去芒鞋踏秋煙拍肩挹
袖七八子石門斜入層崖巔呼童吹火發松炬跣足搯衣涉
沙渚九曲蟻珠一綫穿千態萬狀不可數平疇厯落疊町畦絕
壁噲呖嵌鐘鼓仙佛青蓮枯髮垂棋局蒼苔爛柯古洞室偏
仄潭窟深到此不容人布武童子語我行且止此是老龍出
入之門戶大旱時起膚寸雲洒向魯溪作霖雨噫噓此洞
大約闢自洪荒初洪荒寂寂無鐘鼓洞中鐘鼓誰爲摹洪荒
芒芒無隴畝洞中隴畝誰爲鋤上古先人開圖繪森列萬象
良非誣造物巧以物肖物神者其精形者粗不知十二萬年
後此溪此洞長存無我來偶得一瞬住作詩火急追亡逋清
景一失後難狀此語吾聞諸老蘇

登南山絕頂

邑廩生 余 焯 午暉

三徑黃花爛熳四圍紅樹蕭然遣興南山高處芒鞋踏破秋
煙

峭壁捫藤直上浮嵐把袂徐穿境僻行人到少斜陽幾樹殘
蟬

絕巘荒涼丹灶重岩滴瀝清泉桑落西風醉倒石牀穩抱雲
眠

忽訝身超塵世竟如人坐壺天拍掌一聲長嘯青山綠水悠
然

綠石硯銘

硯端鑄玉堂
新樣四隸字

邑議敘
同知 張向仁 友山

我愛此山石品與圭璋列春露潤之清以潔秋霜勵之堅且
烈望之光哲哲叩之聲咄咄毀之不裂汚之不涅噫嘻是石
也直友筆方友墨友山氏取而切磋琢磨與爲珍惜館之棗

竹園卧以綠芸室綠綺和聲綠天養質是謂君子之交端厥
 始同術同方惟其終同心同德硯陰 昔丁寶臣知端州製
 綠石硯送王安石謂之玉堂
 新樣安石以詩報之曰玉堂新樣世爭傳况以密溪綠石鑄
 成先於面係之銘復於背述其事且繼之以詩曰愿盡密溪
 幾度春一朝拔擢出風塵舊時新樣今時譜拚取方家笑效
 人匪敢美荆公亦聊以廣好人所好之意云爾友山氏又識

車孝女歌 見列女

教諭 范佩蘭 香谷

割股療親固非庸德然得自未知書之女子且得之
 既嫁之後孝行可嘉因賦以志焉

孝近於愚行轉奇年豐車氏有女兒女兒傷心父垂危聞言
 割股乃可醫遂將私割入藥糜忍泣救父計無施那管此割
 血淋漓爾室潛自禱神祇父病霍然果平夷人言孝子不體
 虧女盡乃心他安知苟利於父無不為試問倉皇誰能之真

誠貫日原非癡况又得之已嫁時已嫁而孝猶不衰願持此
 意愧鬚眉

癸卯春初柯煖叔陪汪菱侯葉蔚堂遊魯溪洞予病目
 不得偕行因憶嚮時所歷書懷以贈

洞口人 劉汝楫 藕航

魯水出山何離奇橫空噴雪懸巖飛盤迴起落遶溪下都在
 玲瓏石間瀉盈盈蓄洩蛟龍宅精華凝鍊長天色妙合之精
 來蒼芎西風吹開煙塵隔蟾光直逼水光溢水中碧落流瑟
 瑟九霄敞鏡夜輝晴一印勻圓潭底出龍潭月印迎波翻播水晶
 毳波痕毳影相跳脫潭西虬甲松千尺潭北嶙峋獅子石松
 陰石黛潔洞中虬盤獅踞浴清白巖下漣漪巖上竹天然瀟
 湘圖一幅時搖葉葉映練紋狀得魚遊半奩曲陳嶺洞側泉

鳴銅絃聲大磨

洞前嶺名

寶光照天燭黃漚老死丹竈寒竈畔砂

沈新草綠

相傳黃漚能燒藥爲金今砂中寶光時見

翩翩雙燕藏形迹葛屨何曾

歸馬脊

葛洪會居洞東馬脊山

遼陽鶴去杳難尋當年空飛王喬舄

嘗過洞東之南山故南山亦名舄飛山

雖有名山咫尺隣仙之人兮斷消息昂

首試爲山靈語陸離光怪徒如許岫裏閒雲自去留五千年

來無地主石室空空冷如秋胡乃孑然獨居處豈謂巫娥弗

善守其素雲雨錯向陽臺賦牽惹多情楚襄王一夢遺留千

載汗玉洞不與塵世通人煙流水桃花別有天層嵐隱蔽神

仙路人踪不度天台巔天桃誤引劉郎入却怪胡麻一飯相

糾纏爲此灰心安寂寞酒狂詩淫怕溷濁且任采薪牧犢流

自往自來自灑落山靈見說開口笑君言高潔復諧妙若云

飲谷有前緣除是遞鐘操同調我聞瑕寓黃涪翁其人與地

相始終五百載後盛氏起劍山芳名如芳蹤此外艷花岡神

異棲遲雅稱赫曦冬

張閏禡師

魯山何竟弗相將須君峰下白茅

結五千年來待至今莫辜天地爲君設

讀柳貞公祠堂記有感

新昌舉人張炳然煥堂

曩初客武城萬峯攬浮翠惟柳峙西南特立標名異殷勤叩

主人巔末知之備山固藉姓傳井復以諡字先生家河東偶

膺衢州吏斗米恥折腰掛冠尋勝地憑茲築書臺伏處求其

志石室餐蕨苗玉案羅經笥晚邀世主知遂同平章事居匪

烟霞僻仕豈華衮餌出處大義明潛見皆當位公既屈而伸

山靈同拔萃後賢仰止深爲作祠堂記我讀神往之繭足不

能至何時謝屐偕梯雲遙與跂一勺薦黃泉萬卷探奇致星

斗手可捫俯瞰飛鳥翅奧曠足徜徉於焉願終寄

武陵潭石洲修隄紀事

監生 舒翼 淡菴

武陵崖下武陵潭潭百尺深綠波涵水自西來值秋盛雷轟
電掣雨意酣雪浪排山山欲倒沿溪有路難為保走石推沙
此成洲途窮苦被行者惱盼斷洪流無路通幾度庀材與鳩
工連以木欄填以石早晚督成風霜中隄既屹然巨決滂高
廣丈六長百丈上有巨石砥狂瀾殺其水勢忘洗滌自來文
石係尋思更取綠楊想象之一勞永逸胥是役差為行旅示
坦夷

武寧縣志卷之四十二

武寧縣知縣滇南李 珣纂

藝文 詩

近體

唐

過武寧縣 十月十九日

王 周

行過武寧縣初晴景物和岸回驚水急山淺見天多細草濃
藍潑輕烟匹練拖晚來何處宿一笛起漁歌

見晚唐詩鈔原載海鹽胡遜叟全唐詩戊部

宋

四望亭

韓 琦 相州人

西北雲高拂女牆危亭虛豁望中長田間堤陌成新隰天外

山川是舊疆古道入秋漫黍稷遠坡乘晚下牛羊凭闌多少
無言恨不在歸鴻送夕陽

送徐景道尉武寧二首

黃庭堅 山谷

李苦少人摘酒醇無菴深當官莫避事爲吏要清心葛藟松
千尺寒泉縷百尋公朝有汲引吾子茂徽音

黃綬補一尉還依水竹居身隨南渡馬書寄北來魚風俗譜
鄰並艱難試事初官閒莫歌舞教子誦詩書

見山谷外集年譜元祐三年戊辰作

龍潭石

邑令 吳彥夔

雲山隱隱草芊芊水色迷離怪石邊百轉黃鸝消永日千尋
白練映長天竹垂清露添詩硯燕蹴飛花落舞筵杜林外不
知春雨歇正宜攜酒望前川

嚴陽菴

韓 駒

石根路轉白雲深尊者遺椽可細尋只道來時無一物尙畱
陳迹到如今

過梁口

張商英 成都人

迢迢一水遶千山桑柘陰陰聚落寬好事莫傳江上信漁樵
自不識衣冠

登九官山

謝枋得 弋陽人

真人何代結幽棲累世奎章煥紫泥日月高奔黃道近衡廬
傍出玉繩低

鐫試劍石 九官山

洞天深處構斯亭無限峰巒管送迎題品我慚無妙語爲君
畱以萬古名

遊譚田寺

蔣金部江西連使

我愛譚田寺短橋橫碧波數椽松竹裏靜處不須多

登四望亭

王炎

春老飛花罷園林遍綠陰憑高聊寓目念遠更傷心劇郡才難稱衰年病易侵不如休歇去吾意決投簪

修水晚步二首

山靜天同碧溪流月影遲緩行聊問俗小立卻支頤樵斧寒尤響漁舟晚更移老夫無伴侶稚子獨追隨

風定畱黃葉波深湧白沙前山惟道院斷岸半漁家老去忘時事閒中度歲華經旬如再出便可探梅花

望江樓

周應合邑人

澄江如練正高秋一笛吹秋上此樓有客乘風來縱酒長歌

遠送下灘舟

歸建溪

鄆玉庭邑人

歸去寒溪覓舊盟相逢詩酒足娛情閒雲不礙青山好物外風高心自清

元

曉發高平

范梈

曉發高平鎮前旌路未分小橋煙外過流水月中聞虎豹宜多隱鸞鳳自不羣居人時避暑報有竹連雲

題書齋

周天驥邑人

年光容易逝努力在春畦莫待秋風起梧榕落晚溪

出三碛峽

揭傒斯

積水羣山裏行舟亂石間地偏疑隔世峽怒欲藏關獨鳥啼

深樹斜陽下急灘千憂逢一快未覺此生孱

明

題龍潭石用前人韻

邑令 盛文郁 東民

春深芳草綠芊芊學浴沙鳧戲眼前花落石巖留宿雨舟移
煙渚蕩晴天一聲短笛來漁浦幾陣輕風入玳筵重訪昔人
行樂處坐邀明月醉平川

其二

蒼煙撩亂江心遠空瞰危崖閱歲年清影魚遊光不滅深潭
龍躍怪誰傳詩摹石壁隸成草字補苔錢缺又圓我爲探幽
滋感慨况當風雨竹涓涓

遊柳山讀書臺二首

柳峰聳翠豫寧西人去壁空花歇時古硯雲浮池水溢荒臺
薺台晚風遲鳥聲細調江南曲石室虛存刺史詩我欲投閒
歸未得野巖空自老商芝

柳渾有
江南曲

屐折巉巖日墮西暮鴉幾樹雜啼時臺陰隱隱牙籤亂石際
熒熒燈火遲壁掛雪帆疑泛艇山橫圖畫可裁詩停居小宿
雲邊寺時有幽僧獻紫芝

登太平山謝雨

太平宮接紫微宮雲樹依依雨露通草靜巖深村市遠水流
花落古今同掃除旱魃甦民困呼吸雷霆奪化工登拜相將
天尺五道人猶自臥高峰

春膏沾足沛仙宮躡屐摩雲一徑通道士莫教童子出老夫
不與縣官同寄來玉版三千片煉就丹砂百二工醉後相思
何處是夜闌騎鶴下天峯

按洪武正韻有獨用當併爲通用如東冬清青之屬前明諸作近體每多通用是詩濃空峰互見姑存之而宋濂序曰古音惟諧協故無不通江左制韻之初但知從有四聲不知衡有七音云云

答陳用達題書平政堂韻

甘棠樹底思平政會是何郎舊品題事業空從日月老文章
忍與熒螢齊雨餘印篆苔花潤畫靜鈎簾草色低看我素餐
成潦倒有何蔽芾及羣黎

叩龍湫禱雨

洪武二年七月二十七日

夾道層陰護老松定知巖穴有神龍我來乞取天瓢水洗出
伊山第一峰

龍潭石六首

一片蒼苔古石頭龍蛇剝落墨花秋何年遺蹟無人識日暮
雲陰老眼愁

斷文訛畫辨釵頭露脊稜稜石骨秋寒氣襲人風自冷隔江
雲樹暮鴉愁

絕壁崖懸最上頭雨痕煙影數行秋擬將鍊筆揮殘劒江水
茫茫不勝愁

綠石荒苔古岸頭水空葉落暮雲秋舊題彷彿存蝌蚪漫遣
禽魚日夜愁

蜿蜒小篆幻螭頭石室雲迷知幾秋吟眺欲窮前古事日斜
又動故鄉愁

巉巖巨塊壓江頭霜落空亭幾度秋髣髴浯溪扶杖處攬衣
惆悵起新愁

祭王夫人墓

王輔錢塘人

天上星沉痛莫呼我來空自弔黃姑紫鸞誥冷春風遠烏鳥
音淒夜月孤一子已登廉吏傳諸孫續入縉紳圖銀蟬金棗
長埋處可有慈雲護碧梧

按夫人姪孫王輔任江西南昌道僉事以永樂二年牲帛
登墓拜祭而賦此詩

望江亭

殷縉邑人

江北江南雲樹閉高亭遙望大江寬一燈修水疎林外半榻
風橫舟上寒

孤村漁火映江新沙鳥微茫過曉津兩岸青山原不老雲帆
一片挂紅塵

寄題望江亭

徐觀豐城人

蕭蕭落木下江東水色天光隱斷虹遠浦帆歸荒草白小橋
人戴夕陽紅一聲牧笛芳煙外雙檣漁歌曉露中勝概多因
清望重蘇黃誰與繼高風

望江亭

楊崇豐城人

日暮孤亭碧影閒依人流水自潺湲煙汀雲樹蒼茫外沙鳥
風帆出沒間趨市客來朝問渡打魚人去暝尋灣幾年穩合
紅塵夢江上清波一解顏

甘泉亭

周政邑人

仙風鐔影今何在此日山亭我獨登三尺頓揮香液出一泓
時有白雲蒸空搔短髮憑誰問欲沈塵肝媿未能山鳥向人
多寂寞倚闌小立冷如冰

訪柳貞公遺蹟

邑令馮琦

我來山上柳初碧正是春風拂袖幽苔磴只應芒履踏石門
未鎖客心愁舊時墨沼煙雲護落日書臺麋鹿遊獨坐翠微
無好句掀鬚空對白雲羞

讀書臺

楊

廉豐城人

日光斜照古峰端滿壑清輝上石欄芳樹不從秋色淡蒼苔
常映屐痕乾雲山當日誰知已煙水斯時起暮瀾葉落我來
空悵望數村野火烈高巒

登玉枕山

杜志宣

邑人

玉枕高橫修水湄歸來空有臥雲思鏡中白髮頻搔盡道上
黃梁已熟炊萬里風塵催我倦百年心事問誰宜從今學得
南華睡花落花開總不知

柳山書院

張如玘

邑人

清風淡蕩到人間一片白雲去復還綠草萋萋深挂壁青松
鬱鬱遠臨關何時古硯浮香霧此日荒臺掃敗營擗管難描
蟲鳥篆墨池流水夜潺潺

永濟橋

葉雲谷

邑人

茫茫素練挂千盤遠勢全收鎖石欄雷洞煙雲頻出沒柳峯
龍虎杳盤桓數村花葉浮津面千里飛鴻度晚巒滿壑仙流
何處是溪聲不盡古風瀾

夜渡修水

薛應旂

武進人

明火褰帷夜渡河荒郊風葉下清波寒砧聲落城樓遠征馬
雲開驛嶺多吳客倦聽鸚鵡賦楚人猶唱竹枝歌當時漫釋
山中褐還向山前著芰荷

見方山集

豫寧道中

范兆祥

寒水澗頭千仞崖燕子石下波縈迴獨鞭瘦馬截流去鶴鳥一聲山雨來

送張少尹還武寧

御史唐龍

昔負琴書至今橫劍佩歸一篙春水濶數點白鷗希行篋惟詩滿沿江有泪揮到家秋正好晚圍蕨苗肥

歸里述懷

張天仁邑人

夙昔青雲忽暮年居官三載賦歸田應知病體難勤政存得丹心自樂天新酒但畱賓客醉舊書還教子孫研默聽聽外閒看鶴芋粟充饑大似仙

默聽在縣北官塘源

題張鏡壁

叅政盧懷莘

斜構茅簷五六弓一溪流水柳陰中間來濯足忘歸去橫枕松根嘯五風

斜構茅簷五六弓農家麥飯滿蒸籠梧桐樹下閒行走何用談天揭日宮

獅崖觀音閣

余佐明邑人

巍巍石壁瞰江千仙閣飄飄碧影寒萬里山光洵翠浪千村水色界青巒幾時苔蘚鋪新綠此日芙蓉放淺丹醉倚危闌生逸興櫂歌杳杳入風湍

鍾鼎山

萬廷策邑人

石鼎封幽室爐灰冷舊山春風試相問花落水潺潺

伊山

古洞畱仙意四時秋滿溪雲蒸龍子夢雨洗石牛泥吳楚流相入林泉影欲低幻傳伊叟事回首竟茫茫

朱家山

叅政盧仲佃婺源人

風宿秋初飽單車石筍前懸崖高噴水密樹半兼天詩冷酬
清趣民窮結苦緣憂時頭盡白慚媿祖生鞭
盡日空山道稜稜石磴連鳥飛人影下雲散馬蹄前寇盜頻
年起風霜比室懸樛材當重託何以答堯天

宿羅溪公館

獨臥空山裏愁心解佩刀夜深猿自嘯風冷月初高問俗疲
郵傳憂時損鬢毛坐看狂寇滅濁酒灑征袍

羅溪曉行

滿天遊意好秋氣淨詩脾石兀浴溪轉山高見日遲風飛殘
葉去人被野花嗤仰見犁雲者停車有所思

魯溪洞

王公旬

鬼斧何冥密幽芳鎖石瀾天心豈好逸文物乃相干泉漱一
泓淨風清六月寒悠悠塵外路短車誰過看

舟次武寧

南瑞趙鵬程
兵備

雲外旌旗拂露清碧波微動最關情乘流擊楫江頭轉疑是
絃歌舊武城

丹崖訪呂仙遺蹟

教諭游龍淵分寧人

丹崖爐火煉經年石室苔殘起暮煙鍊笛一聲山月小醉騎
黃鶴下雲邊

玉枕喜雨亭

甘雨時來六月涼賢侯政暇日初長河東臥治渾無事夢入
梅花遶砌香

看鶴亭玩月

李漢

華表歸來鶴影殘月光斜照碧波寒清閒擬結神仙侶夜靜

狂歌倚畫闌

武寧道中二首

巡撫林俊莆田人

茫茫愁疾博焦煎撥遣撝呼借晝眠幾地煙霞畱日月百年
文字入山川洞中白石豸牛處華表青峰化鶴年欲往桃源
尋古蹟小舟閒坐武陵仙

修醴江帆落午煙怯寒四月尙重綿青山屋上此何處獨樹
風高雲未眠古渡夕陽忙鳳口急流歸意重鳶肩倦遊薄作
謀生計待買沙溪學種田

按部武寧道中賡前韻二首

叅政王綸

路轉羊腸百慮煎籃輿穩處坐忘眠招邀風月橫修醴罨畫
溪山近輞川夢遶丹墀依上國愁添白髮過中年塵容自惹
山禽笑莫向深源問古仙

榻拙寒煨起柘煙無端風雨更連綿屏含山色春拖翠枕遶
灘聲夜不眠青鏡羞看搔短髮洪崖笑對拍空肩尋常不作
謀生計竟欲從茲種秫田

按部武寧道中賡前韻二首

提學副使邵寶無錫二泉

試摘新茶帶露煎風雲深處得高眠曉山排闥青連郭春水
浮槎綠滿川瑤草自宜生此地甘棠寧復問他年拂衣未展
還山願何處丹邱訪列仙
萬山旌節破風煙細草承輿軟似綿蒔稻歌喧春鳥和采桑
人倦晚蠶眠兩旬廬岳仍回眼百里洪厓更拍肩讀罷新詩
賡未得夜深猶夢對莆田

築城樓成登眺

府判張翼

築聲初散楚雲端使者頻來駐馬看十里江流增遠趣四山

秋色入雕欄草間狐兔中原盡天上旌旗白日寒從此公餘無一事只將孤劍倚巔巒

九日招諸文學登玉枕山風雨不果因集躋寧樓

玉枕何年是勝遊重陽堪約雨堪畱山城未種潯陽菊濁酒聊登江上樓三楚風煙催落木千家砧杵動高秋憑欄不用思王粲賓從全消暇日憂

度雙嶠宿松山寺

使者行田春漸暄崕呀千疊隔春原沿流映袂行天上飛巘連雲到足跟三月驚心催布穀諸天畱客宿祇園白牛不去元猿出此際高吟可自論

石燕寺

楚雲西去路漫漫萬里長天一線看就宿岳僧畱偈室似臨

天女散花壇林猿窺客蘿陰薄石燕迎人雨氣寒何事緇塵淹俗吏每因勝地得盤桓

湧泉堂

野寺依微楚甸分千盤曲磴入氤氳不緣履畝行芳草那得飄衣到白雲樹裏殘霞明夕照泉間涼籟散幽芬逃禪獨坐莓苔冷一夜空山猿鶴聞

癸亥季夏紀雨

余 弼 邑人柳溪

六月六日雨傾盆江北江南何處邨菜色藜羹已白骨錦衣玉食自朱門風波半醒漁樵夢毛羽空畱鷗鷺喧渺渺修江流不盡吾將閉戶睡昏昏

大陂潭

大陂潭水碧如苔今古名流見幾回倒影天光長作鑑好懷

應向此中開

遊長墅源迴龍寺

夏木陰森黛色濃，偶來方外寄閒蹤。
關中見說青山老，華表猶傳白鶴空。
路入雲根天杪忽，峰迴日脚石碕墜。
半生塵劫何爲者，慚愧山中六六峰。

遊靖公庵

尋真偶過靖公庵，趺坐蒲團興愈酣。
山色到簾成幻影，花香入座似優曇。
半生塵事勞心夢，一段禪機付手談。
牧笛數聲殘照裏，又隨馬首向東南。

寓賓陽館逢雪書懷

履端風雪盡侵眸，山色渾如白頭塵。
夢更誰能喚醒宦情，今我始歸休探梅久折東郊屐。
訪戴空維子夜舟，却憶袁安高臥穩柴門。
深閉思悠悠。

柳山

鳥道盤雲幾萬重，昔人晦跡此高峯。
何時結屋蓬蒿內，礪戶蕭然對古松。

二難湖同二東兄清溪兄泛舟

宦情今對白鷗洲，世路奚須著巨眸。
地僻不聞絲竹勝逢人，休自說江州。
買得春風錦水涯，時時載酒上仙槎。
莫言醉夢浮生拙，醒眼相看亦自差。

飲林康侯館

余長祚 邑人

不似居城市，蕭然野趣深。
柳尊容欵酌，竹榻縱披襟。
歌歇鶯能續，書翻蠹可尋。
相過得一醉，未是世人心。

同林大宗孫爾弓過輝之姪飲分舟字大宗以是夕還

棹修江

詩酒吾家社何時不可畱况來蔣徑客同作阮林遊露下芙蓉夕天高鴻雁秋相攜芳渚畔去住總虛舟

黃厓書屋贈別沈孺林

空齋高枕到斜曛但過能書白練裙嬾癖自憐嵇叔夜詩才誰敵沈休文一尊繾繾花間雨孤棹夷猶江上雲灌木陰森轉黃鳥相求恨不共君聞

陸明府望雲亭

聞道鳴琴暇登亭重惘然瞻雲雙眼切愛日寸心懸江饌新魚美園供孝筍鮮唯應將母鳥飛入帝城邊

山居卽事六首

驕雲恒作旱畏日不成秋擬就青林適還生赤地憂風多依漳起泉已斷谿流生計吾誠拙勞歌詎足酬

草澤愁如許桑林事有無山川行禱遍涓滴望來枯真宰應難測浮生盡可虞羊求儻相過莫道徑終蕪

持金朝入市問糴暮空還橡栗家家拾葵蔬頓頓艱空雷猶隔地毒霧不分山試察看間色何時可破顏

往年青女降斂積已無餘今日黃花媚新苗宛自舒凌寒農共詫滯穗粒常疎食指吾繁甚謀生豈晏如

白紙催租者公言官遣來雞豚無可算鴻雁實堪哀二月絲何在三年穡已灰傳聞蠲賑惠早晚及蒿萊

如何荒札後白晝虎縱橫不惜封狐假時餘弱肉并松關嚴蚤閉樵徑戒宵征北渡非難冀應傳異政名

秋晚山莊雜興 六言

雨濯峰峰膏沐風傳樹樹笙竿推却羲和高枕灑來陶令新
酷白苧涼欺欲怯青萍色動堪呼三徑求羊代主千秋左馬
爲徒

石磴斜臨絕澗柴門直對層巒林光競送朝旭竹葉徐驅暮
寒身業蠹魚自擬人情木鴈同看此中歲月藏拙何處風塵
罷歡

旱後黃尉見訪山中兼訂入邑之期

寂寞衡門掩薜蘿殷勤仙尉遠相過開尊一任烹葵薄懸榻
仍勞折簡多雁影千山憑望迴砧聲萬戶奈愁何知君保障
遺民意不待重陳雲漢歌

筠雪樓秋思

西風一夜到林邱水簾銀牀半是愁旅雁影傳征塞冷鄰砧
聲落故園秋花開別圃芙蓉峴露下空江蘆荻洲萬里月明
天似水獨懷無寐起登樓

秋日山中有懷方比部士功文

空山容易動離思况是風梧露竹時遙憶美人秋水 upstream 居然
仙吏白雲司三朝冠冕推先達一代文章啓後知最愛江樓
好乘興相從載酒訂前期

張明府枉駕城東

寂寥環堵寄城東鄭重傳呼小隊通明府車停秋色裏野人
身在白雲中蓬蒿舊徑憑誰展荷芰香心許暗同安得便期
彭澤宰陶然一醉菊花叢

過頭陀寺

空傳紺宇結峻嶒寂寂繩床不見僧西望彌天路何極長明
誰共佛前燈

連理松

大田道旁古松二株相抱而生蒼翠相
望蓋數百年植也偶憩其下口占是詩

鐵幹扶疎老石壇千尋高出白雲端排空雷雨靈長護坻地
虬龍勢互蟠黛色對分雙嶺秀濤聲不斷四時寒撫餘梁棟
尋常事珍重行人飽眼看

寒泉樓

泉甘冽獨異潘孝廉先大夫南楮公贊爲井
建樓覆焉中虛獻武鹿虛引泉而上以饗客

樓下靈泉清且深蕙榜藻井晝陰陰汲來乍挽銀河轉滄處
翻疑璧月沈抱甕蛟龍春自避濫觴禽鮒晚難侵君家世澤
同茲遠一漱常令洗我心

賓陽館席上同張魯方伯聞方履中送沈士範還宛陵
相值更相歡蘭燈促夜寒舉頭見秋鴈歸思滿江干酒態予
仍放詞名爾自寬西來一片色儼作敬亭看

寄武寧盧秀才立宇二首

大學張位新建
士人

不見修江客愁思若萬千才名傾上國壯氣壓先賢傲骨誠
如此乾坤必共傳西山落日處望斷好風煙
老伯歸舟日金風拂面時尙傳吾子好因寄五言詩古道伊
誰問窮愁只自知何當得意候慰我遠相思

按立宇諱由跡與洪陽善洪陽舟泊饒州見其父病載之
歸寄以此詩

修江雪舫八首

邑副林維翰康侯
貢

遊子多歸思孤舟與雪行帆馳千里浪江曲九迴情斷岸寒

猿泣疎林宿鳥驚故鄉何處是流水渺然聲

到來修水月猶帶五湖煙山水元同調鄉心各異天傲廬原
不遠遊子竟無眠寂寂行裝薄扁舟一葉旋

宿棹凌晨發天澄雪意微水明冰共照花出絮齊飛素浪轉
帆疾蒼林度鳥稀帘招柔櫓外取酒敵寒威

夜靜灘聲厲三碁水急流篙師驚破石雪影射雙眸縱飲難
爲醉放歌不解愁故園圖畫裏落月滿歸舟

朔風連夜急觸目感多情不寐天難曙通宵眼獨明雪連修
水白人盡故鄉聲莫問篷艙客窮途一瘦生

釣雪修江上吾心不在魚水雲時淡淡蘆雁故徐徐百感從
波遠千山入目虛故人如有意載酒到吾廬

魚刀亦疾急與雪載風馳帆轉蒼山沒櫓開皓岸移鳥聲啼
不住舟影蕩將迷知是故園近乍聞新水疑

巘岼一峯出迎予海上桴應知文暢宅不譴北山逋遊覽何
年遍卷舒與世殊柳公遺榻在嘯傲得真吾

拜余柳溪夫子墓

十里青山暗數行老泪傾東風如可托吹向芙蓉城

遊獅子嵯紀勝

五排

張世泰

清江人

盤磴陟叢林縱身出紫岑佛澄水月相梵振海潮音巖石封
龍藏河沙布路金煙含城樹遠色送野田侵斜日松爲幕長
江練作襟臺凌碧落迴座隱白雲沈高士餘清興山僧自古
心鳥迷千嶂晚秋入一潭深佳話隨人得香醪帶茗斟勝遊
端莫負采筆爲追尋

和獅崖韻

撫州盛宗齡 邑人
教授

獅崖開幻閣，鷲嶺俯危岑。護法龍蹲踞，談經鳥解音。點頭常聚石，散地自多金。知是諸天妙，不爲野馬侵。水光盪日影，禪寂豁春襟。載酒憑賢聖，浮鷗任淺深。登臨謝眺意，隨順梵王心。佳句千花雨，遊情一曲琴。相將趺跏坐，似有醍醐斟。狂興猶難盡，振衣獨遠尋。

過磨盤嶺宿寺題

辛苦度危嶺，巖岈石磴斜。路疑天上近，雲入望中賒。禪性空庭柏，民情滿縣花。風塵慚越俎，時予自松陽解組歸里駐足問桑麻。

柳渾精舍同弟振宇分韻

盧由跡邑人立宇

湧翠亭邊荒草沒，讀書崑下白雲飛。我來正值三秋晚，空向庭前憶落暉。

贈別余長祚還武寧

朱多炆南昌人

一片西風布帽寒，孤鴻夜度白雲端。夢尋玉枕山前路，明月明宵兩地看。

謁九宮

通判王近偉

吳楚東南勝，仙踪寄上峰。瀑流千頃雪，雲際一聲鐘。古木巢元鶴，懸崖俯怪松。何當脫塵署，長傍紫霞宮。

九宮山

察政吳國倫興國人

拄杖尋真去，漸遙彤雲片片起。山腰金函隱約朱陵閣，貝闕氤氳絳節朝古蘇。平封雙劍石懸泉，直瀉萬山橋關門喜。過黃冠子指點仙宮在碧霄。

獨躡飛巖御八風，逍遙萬里一冥鴻。神仙樓閣虛無裏，吳楚山川指顧中間道。欲窮三景秘，棲元聊借九靈宮。真師白日騎雲去，天上人間咫尺通。

積翠凌霄俯四荒，故宮營自晉安王。名山終古留真氣，羽客何年返帝鄉。黃鶴似迎芝蓋轉，綠雲偏映葢珠光。總知人世如棋局，那得逢仙七日忘。

同阮在田宿九一宮夜談

共有登高興，招携九日來。草荒迷藥井，雲淨出丹臺。遶檻羣峯暝，衝星古觀開。授真人不見，終夜坐銜盃。入山尋阮肇，採藥遇胡麻。豈卽天台路，聊過羽士家。老餘仙骨健，狂益酒懷賒。一枕黃梁夢，浮生總未涯。

九宮山雜詠

給事 孟養浩

老龍潭

深潭夜夜有龍吟，龍去潭空一鑑沉。鐘磬數聲雲外度，怕驚風雨抱虛林。

怪松坡

怪松坡上有松無，虛憶當年五大夫。華表月明歸鶴夜，繞枝空自笑啼烏。

試劍石

仙人劍氣五雲端，一擊誰云裂石難。想有昆吾留巨壑，龍光猶射斗牛寒。

獅子崖

嶙峋巨石擁朝暉，隱隱獅王度碧雲。仙子非關騎不去，欲留神物鎮妖氛。

噴雪崖

匹練誰將萬仞端，紛紛冰雪落層巒。松濤一壑清相映，虎豹猶驚六月寒。

鳥道紆迴一徑開元關駐足暫徘徊烟霞萬壑平凝睇縹緲疑從碧漢來

留別余處士明吾

湯艮山 青田人

鴈蕩山頭處士家偶携筇杖到天涯秋風野服鄉心遠凍雨寒雲客路賒湖海十年空浪迹蓬萊千里欲尋槎扁舟此去如相憶七十峯前一徑斜

過桃樹港寺

葉來昌

寒風獵獵歲將徂葉落千山樹影疎竹徑斜穿通梵刹茶鐺新沸對圍爐聽殘僧磬聲淒切參透禪機意有無回首夕陽高嶂外臨溪三笑倩誰圖

寄余柳溪夫子

孫爾弓 邑人

秋風颯颯意如何才士于今潦倒多寄語吾師歸及早還將詩酒付山阿

蕃昌縣除夕偶憶家園得詩二首

劉漢昌 邑人

兀坐東風裏始知春日遲椒觴寒暑夢爆竹異鄉思歲改憐分刻家遙念本支一官匏繫久媿讀鶴鴿詩
堪歎人駒隙歡虞不一端家浮千里外歲僅片時殘薇省春先動棠陰臘不寒殷勤酬柏酒莫解泪闌干

董物生以所作秋聲稿見貽賦謝

余士清 邑人

衡門不待鶴書來石隱終身卧草萊天地隨時供蠹簡風塵伏櫪老龍媒百年懷抱傷吾拙九辨悲歌羨汝才如此秋聲吹萬里看君獨步柏梁臺

國朝

歸楊田

盧全耀

邑人仲熙

秋風落葉萬山空
歲歲飄零客夢中
故里尚留茅屋在
何妨人笑白頭翁

送朱士先還豫寧

周亮工

浚水標圖

司理盧公圖龍以予累死於都門士先扶其柩回

盧公正氣傾南北
朱子交情重死生
豈意斯人爲我累
獨憐好友載棺行
風波到眼江天暮
雨雪環軀去住輕
春水布帆遙悵望
義聲吹滿豫章城

雨中過朱家山

邑合

馮其世

遠峯難竟度寒雨
下霏霏幽穴猿心善
深林鳥語微風高
蕩馬首石濕沾人衣
宛轉羊腸道紛紛
木葉飛

了髻山

縹緲烟鬟何世妝
年年春樹散芬芳
桃花朵朵漆紅淚
蕙草莖莖帶晚香
雙縮青絲天半出
獨懸皓月夜中望
有風莫向鄱湖去
大小姑山日夜忙

馬脊山

翰林

盧

高

興國州人

山脊開奇險橫空
駕石梁崖尖禽影斷
磴曲馬蹄強一水澄
秋練千峰盡曉霜
殷勤詢故國吳楚正分疆

遊太平山次東民公韻

盛際斯

秋風送我層雲上
歷歷晴巒景自空
巉巖欲摩星斗亂
清虛畧與滄瀛同
鉛爐種盡蒼苔冷
石室仙存宿霧封
此夜月明松色好
危崖兀坐數諸峯

柳山次東民公韻

躡屐酣搜柳壁奇
烟光憔悴暮春時
書臺縹緲儲雲富
僧寺

幽深得月遲山鳥噉噉鳴古瑟林風習習韻新詩我來欲襲
仙人蹟聞道龍巖有赤芝

秋日過獅崖四首

邑令 金之桂 閩山松軒

霽色晴郊遶翠微層巒古樹隱秋暉過橋細草隨溪轉出岫
閒雲入野飛寺近東巖鐘磬靜城連南浦水烟圍山深幾度
忘酬酢時有禪心叩竹扉

四面山光附郭幽凌空一柱插雲浮靈源悉出臨千澗孤嶂
平分鎖萬邱竹外殘霞穿古徑臺前疎雨送行舟安禪寂寞
秋聲冷竚看寒濤靜碧流

憑虛小閣上方來怪石初分烟霧開亂樹飛紅霜後葉蒼巖
積翠雨中苔躋攀不碍攜琴至杖履還期放鶴回柳子峰高
青入眼獨憐山色少塵埃

參差綠竹映清坡路轉閒亭挂薜蘿曲磴朝陰松滿嶺空潭
日影水澄波烹茶偶話山僧偈鼓柅閒聽漁父歌嘯咏林巒
饒逸興詩情又載勝遊過

巾口寺感懷二首

汪 瀾 邑人

著書安所用哦句益自悲明月上修竹冷風吹破籬家貧遭
怪水被裂恨嬌兒夜盡嚴霜結江頭木落時

古寺罷鳴鐘人間睡正濃鑽研如一蠹緜蒯剩雙龍僧房無
佛法蟻國盡侯封思就黃冠客劇苓尋老松

看鶴橋

仙人常至此白鶴有遺音過峽龍留氣穿城水有心臨溪聞
搗練倚樹聽鳴琴山邑多賢宰沿隄花露深

修江舟中同余山翁盧眉士賦

胡文衡 邑人

修水寒日暮野梅帶雪開篷牕一夜酒天地百年才江氣依
雲靜山風送雨來莫愁仙路遠人世有蓬萊

舟次中口答胡掌南前輩

余文梓

邑人
山翁

杯酒同茲夕寒泉凍未開乾坤留我醉騷雅定誰才漁火空
明滅江風自去來扁舟此一宿豪氣轟蓬萊

過橋頭寺

蕭露瀼

何處留鐘磬尋幽到石津閒廊通鳥語遠浦度漁人露冷蒼
苔古風梳柿葉新澄波流不去心與白雲親

遊溥濟寺

一望盡寥廓奇觀近水多松濤空匍匐梵影倒婆娑牧笛橫
天籟漁烟起棹歌莫嫌登眺晚新月到銀河

獅崖和大尹金松軒韻

斜穿曲徑入清微倚石豪吟盼遠暉好月有情聯榻坐嬾雲
無意出山飛水光未改花千箇竹色依然翠四圍只望遠村
烟欲亂牧童隱隱叩柴扉

尋到巖端結構幽乾坤縹緲瑞烟浮靈源點滴歸秋浪敗葉
飛空入上游入達窻開延素月一聲鐘下駐虛舟數來此地
非棲寂笑挹青峰散酒籌

層閣岩堯信步來一時眼界爲誰開點頭許我冠投石踏足
隨人屐印苔燕子崑前霞氣散龍潭石上暮猿回箇中尙有
晶明宇辦得些須不惹埃

晴嵐徃復宿羣坡四面巖崖挂薜蘿深谷儘能容我輩白頭
何事涉危波高吟此處多詩債款乃頻來聽棹歌五十年前
歸一夢同儕憶取舊相過

柳山

洪文機

邑人
柳巷

柳翠千年在往來惟白雲大江明有影衆岫遠為羣宇石荒
苔沒書臺冷澗分平生多古意憑弔獨殷勤

獅崖和盛于楚韻

鬼斧自誰闢危崖落半空苔生怪石碧日落遠山紅鳳翅空
搖浪柳橋暗度風最憐江上客漂泊夜西東

沿江經石磴縹緲入遙峯漸覺塵心遠偏滋野興濃斷雲歸
翠峯冷露滴芙蓉不盡涼秋意空門響暮鐘

過雙嶠山洞門

洞門深處隱朝暉泉動雷聲落四圍崖樹根攢危石瘦澗毛
翠滴野雲肥踏穿屐齒遲遲上驚起山禽故故飛一路清風
攜滿袖送人直到釣魚磯

龍潭石和水賓韻

一江秋水碧鱗鱗巨石峻嶒氣不馴苔蘚盡侵長日翠烟波
不改舊時新蕭蕭古篆半明滅漠漠遠山誰主賓只看諸公
留好句不教幽討愧前人

半月堂

闢得蒿萊構小堂數株楊柳護垣墻室藏晉草裝潢舊架插
班書蠹粉香市遠未須愁酒債鄰多能許共蠶桑夜深一榻
寒雲在和月移來坐小廊

雲蓋山

宋岳忠武誅李
成過此有祠

盧宏勳

邑人
鼎丞

如此高祠詎偶然曾經詠賦過山巔東風有客重相問踏遍
梅花落照前

過盤山嘴

余文壁

邑人
總夫

我來幽谷裏迢遞一山盤磴窄愁苔滑林空怯露寒小橋連
斷岸峭壁下危湍年老爲貧累莫嗟行路難

遊石燕巖

翰林李應熙興國州人

石燕盤空入雙門接小天微明深見月做勢豁通泉殷壁尋
遙響分蘿出野烟武陵知不遠莫返釣魚船

溪園秋夜會飲別意和盛水賓韻

客子衣裳薄况經千里風含情甘獨枕不忍聽歸鴻萬事隨
秋葉吾生等斷蓬天涯無限恨太息此宵中
盛氏好兄弟殷勤款暮齋念予行欲遠不忍便分乘斗酒開
殘夜千金囑素懷與君萍水合安得此無涯
丈夫慎所托奚復事浮聲性命暗相許皇天正此盟君能恕
慙直予實寡將迎此道向來薄寥寥太古情

春風千里客奄忽逮三秋不以慕高節胡爲淹此游生無騰
化術死爲故人愁嗟汝紛紛者焉知我所憂
久與世相逐性情亦改更大都心所惡末俗以爲榮感子山
中樂增予世外情何當理片石從汝學躬耕
對酒不能飲愴然悲轉深匪予輕遠別天屬繫人心歸鴈憐
同侶慈烏爭一林去留均失意爲汝獨沈吟
昔予來茲邑與子若商參何意蹙攜手淹留遂至今兒童依
我長僕馬習人心別後荒涼月伊誰共夕陰
古之訂交者相揖在班荆此事關天合由來亦不輕茅堂今
夕酒鞍馬薄朝行相看十年淚愴然此弟兄

石鏡山

陳嵩齡

方諸磨太始萬古慧光呈守黑從知白持平得至明山體平而色黑

往來頻此照妍醜自他生况復含真意塊然絕臭聲

馬岡寺 步金明府韻

張應遜 邑人

岑寂馬岡峽天晴寺亦陰山根連霧氣樹杪起潮音小坐分
茵草微吟驚宿禽晚來山更靜素月出幽林

楊浦

豫章西岸足徘徊一帶垂楊映水隈沈網相將翻細浪斷雲
時復洗浮埃新春葉密流鶯轉斜日林深倦鶴回莫謂江皋
風物寂天然圖畫浦南開

龍潭石

盛謨

十月風烟盡寒潭清我神淋漓蚪蚪字剝落核桃皴日月勞
賓主厓溪遞故新漁歌方欸乃萬石自嶙峋

石燕巖

堂深秋意靜乳滴簷櫺虛石劍存陰壁烟禽宿奧厨崖空時
漏月龕密可藏書屏迹平生意移琴就汝居

暮春攜羅穆高懿羅吉焜遊黃婆洞

宿昔經心地追遊及暮春石門深鎖鑰鬼斧費精神回首艱
難夢半生憔悴人諸君來對月看取肺肝新

同余比部騰蛟熊太史為霖季弟樂門人張任遊獅崖

分賦

寒獅影不定白日蕩虛空人與漁舟遠潭浮柿葉紅斷垣堪
病佛絕壁有飛鴻幾度憑欄意悠悠直向東
好友連清袂脩然亂石叢門依枯蔦澁磴入碧苔濃宿漲延
新淑懶雲戀故峯為誰歸意緩貪看數株松

雨夜偕余嶠治邑乘

艾國長如此桃花幾度春稽留山水鑰寂寞古今人燈蕊延
深壁雞聲及遠津遙憐千載後風雨與誰親

過鄭山人草堂廢址

呂昌言

芳草萋萋百鳥喧千秋悵望此林園空留廢塚多殘字唯見
頽垣沒斷痕秋水滿江飛白露女蘿挂壁暗黃昏巖陽幻雪
今何在清影龍潭塔獨存

過方雁里先生墓

停輿獨自踏荒榛石馬蕭蕭傍石人老樹骨存千載鐵遺碑
字沒數行塵年年鶴唳清秋月夜夜烏啼玉淑春望到夕陽
紅盡候倏驚濃露濺衣巾

桃源奇石

在薄刀嶺下與建昌接壤有合掌石碁盤石葫蘆石眠犬石轎石

雲根幻出陸離天日映桃源草木妍醉眼摩挲驚欲絕何須

醒酒問平泉

我來幽壑見奇文怪石玲瓏幾片雲可惜袖中藏不得幾回
搔首立斜曛

橫塘寺二首

余騰蛟

獨愛橫塘寺盤空入翠微寒雲穿石罅亂竹隱山扉野碓舂
烟冷孤鴻帶雪飛疎鐘乘暮發木末一僧歸
何年闢此境鑿險出清幽一徑盤雲脚千峰入暮樓佛燈空
外靜魚磬暗中流歸路邨烟裏落月滿荒洲

修江送別李太史屯菴還富川

送子大江上滔滔江水寒征衣連夜雨羸馬向長安到處黃
金貴由來我輩難深知宦情冷相贈以秋蘭

雨中盛五水寶熊大鶴嶠過存吾園

濕草延山路松濤洗石門有風吹好友冒雨入荒園池鯉方
驚夢秋花欲滿尊高譚夜正永聊以息遊魂
荒齋寒夜坐雁唳滿高原雨氣橫天末秋聲度草垣簾前杯
酒熱燈下笑言溫莫謂聯床易新詩且細論

遊石燕崑

鳥道通靈境微茫一線天岳藏太始雪穴注古仙泉曲竇開
清籟重關入暮烟披蘿出絕頂髮髯見漁船

遊獅子崖分賦

懸崖壁立俯江流看我凌虛眺暮秋水湧晴波開夕照山凝
黛色上高樓荒涼石逕苔痕老飄泊閒雲雁字浮惆悵倚欄
無限意蕭蕭殘月下扁舟

歸延薰別業

流水西來玉一灣柴門隱隱對南山青楓十丈扶雲起白鷺
雙飛共我聞風雨窮愁空旦暮天涯閱歷幾辛艱故園鷄犬
猶相識簷外低徊去復還

修江晚渡

盛樂

短楫喧南渡孤亭已半陰落霞從水遠暮氣與秋深野岫生
新月衰林會衆音扁舟來往便勞我到如今

寄題燕子巖次李屯菴韻

癸亥冬屯菴遊燕子巖賦詩手書一牋寄留雪且言巖石奇詭當得季子以高絕之韻狀之予負疴屢歲不得一往頃慕菴翁喬聯袂入崑各次原韻一首走使索予同作接巖畔主人刻石予念屯菴下世墓草五綠矣余熊二君續茲韻事潦倒病夫弱縮窮樵今昔之感營營于懷西望雲樹強附一詩悵然彌日

想得最幽處虛明墜小天老雲低宿燕凍雨怒翻泉世外空
塵鞅爐中自碧烟故人遺墨在珍重米家船

賓竹堂雨中會飲和余比部蓍菴韻

一逕隨衰柳黃昏雨到門主人正高會佳客滿亭園健筆蕉
抽葉雄談酒倒尊病夫愁夜永帶索動秋魂

建溪喜晴

乾鵲聲驚四楚譁曉來躡屐過鄰家一峯雨歇雲生白幾處
天高日散華小犢蹄輕耕活土新禽翮健撲殘花樵歌已向
平橋度好理藤床焙早茶

龍潭石

參差石勢裂魚鱗橫鎖江潭氣不馴白日斜穿苔骨老洪濤
低亞漲痕新毒蛟潛處欲無窟寒雨過時疑有神試向危崖
摩古篆漏痕叙脚屬何人

陪蓍菴崔嶠過鄭山人草堂故址

豐熙舊宅倚江濱野老猶知說避秦到眼烟波隨意濶沿堦
碧草至今新看來天地還容我如此溪山不負人比部可能
真好事誅茆便結鄭家鄰時蓍菴有重構草堂之約

冬日同余蓍菴熊崔嶠徐兩岑朱孺狎張月耕遊獅子

崖分賦

三年不上後猓石今日從君豁遠眸起雨濤聲低入岸新晴
山色靜當樓諸天半落丹楓外鐵鎖空沈古渡頭共倚危欄
貪白醉翠蘿風起野烟流

龍潭石次始祖東民公韻

石在縣西數里下為龍潭巉峭蒼古石筍嶙峋聳立
數丈黃浩翁篆龍潭清影四字刻石上至今猶存其
彷彿云

老石橫蹲烟渚頭江濤出入禹門秋
砢砢寒壁折遺篆淅淅悲風續舊愁

霜氣平凝斷碣頭水宮蕭瑟白蛟秋
當年魯直頽眠處喬浪長流醒後愁

新詩墨篆綴繩頭浪送沙迎春復秋
水月廢亭唯綠草先公去後幾人愁

石上舊有亭曰水月亭

默默深雲襲隴頭餘明倒落一江秋
頻凌石筍最高處坐見東西南北愁

狼波叠觸腐觶頭白草離離破塚秋
零魄千年歸水國懸知沒世亦多愁

空遺幻跡白瀾頭雨蝕烟燼六百秋
窮石于予三寄慨風吹不盡古今愁

山棚鼓子詞

楚人來寧墾山者歲以千計絕巘層崖雞犬聲相應
火耕旱種百鋤並出每數十人爲隊其長腰鼓節歌
以一勤惰甲子春予從伯兄遊大原洞遍歷諸峯緣
梯度索四宿山棚畧得梗概雜叙成句曰鼓子詞付
諸山農俾歌所事

倚石堆柴結短門千峰萬壑散雞豚
可憐人滿無耕處掘盡山頭枯樹根

風掃長嵐雨脚疏春星曉動百家鋤
楚歌處處吹楊柳打鼓高陵種玉蘆

亦披箕笠號田家耒耜無勞稻有花
谷裏生兒谷裏養南山菽粟比山茶

潏潏澗水落高林劃斷雲根萬丈深路轉幽岑知幾許兩峰相對說晴陰

小婦擔茶上翠微峰峰路險記依稀不知春色來何處亂插紅鴉破雨歸

斬木剗心作浴盆編茅成薦定奇溫終年飲啄同山鳥爲買長鑿出遠村

林莽焚餘變秫秔梯橙夜半有人行祇今何處可安枕試聽空山擊斫聲

大豆黃梁取次登山棚夜飲劈雞膺筠籠新壓玉蘆酒松火高燒四照燈

積雪嵯峨十八盤閉門枯坐煮菘團地爐明火連昏旦兒女無衣不道寒

隨灣逐澗跡飄蓬絕嶺年年怨朔風山食山居多苦趣喜無胥吏到山中

伊山

潘淳輝 邑人
玉山

幽居歷落傍山阿樹繞長村引薜蘿鐘磬無聞僧寺遠巉巖深處白雲多穿崖古木橫空立躡屐遊人載酒過只看龍鱗飛五月洞中風雨接天河

觀音閣

嵯峨傑閣逼諸天一逕紆回繞翠巔灘送濤聲奔渡口山迎春色到樓前晨鐘屢醒幽人夢梵語頻通過客船獨倚狻猊貪眺望竹西風起亂殘烟

遊龍潭崖

翰林 熊爲霖 新建人

半壁江天峭龍湫獨有神潭空沈巖影石老裂砮皴烏蹟摩

崖古雲根入畫新徘徊歸未得愛此碧嶙峋

澧溪夜泊

澧溪霜月影待我及元冬遠浦陳漁火寒山隔寺鐘萍浮天
夢澗埜泊暮烟重人語環風樹誰家正晚春

魯溪

劉祖陶

邑人月堂

泉疏一脈老龍湫十里寒烟到洞頭怪石參差爭變幻高峰
迤邐互綢繆雲蒸絕壑天光隱雨過幽巖樹影浮筇杖探奇
探不盡夕陽歸去夢仍留

橫塘寺

羅任俊

邑人英人

古刹何年築此山元鐘幽磬隱林間巖泉濺竹飛簷細石洞
眠雲入戶閒老柏森森藏睡鶴回廊夜夜宿雙鷗我來鞍屨
探仙蹟唯見松梢衲子還寺前有鞍屨山

遊石燕巖步李太史屯菴韻

謝鳴謙

南豐人

何處爲仙宅如今到洞天有靈皆幻石無際已通泉細草深
含翠飛崖淺帶烟感君猶古道擬向泊珠船

南亭晚眺

宜黃人 訓導盛鍾靈文潔

孤亭橫石渚古意已蒼涼岸遠人烟積川平客棹將千村藏
暮色百里漾風光只看飛鴻過秋聲滿夕陽

市口暮泊

余

螭

邑人映瀾

村烟漠漠水悠悠古渡漁歌何處洲幾樹楊花殘客夢半天
風雨滯行舟岸回馬首陰雲合石轉羊腸白浪浮僧磬數聲
空外發佛燈明滅大江流

修江晚發

森森晴江趨晚風蒲帆數幅夕陽中草分曲岸參差綠花到

春山縱橫紅飛絮堤邊鳴百舌斷雲峯外唳孤鴻連年此日
鄉關別穩枕烟波客夢同

楊田卽景

日暮山頭下遠樵高林落葉自蕭蕭鴈行飄薄知何處惆悵
深溪度板橋

獅崖閣

楊

屋

南昌子載

野興尋孤寺頽垣但宿鴉人稀芳草合石峻古藤斜山縣春
宜早江帆雨漸遮坐觀樓百尺三面種新茶

龍棲寺

盧霖

松竹鬱層翠散懷此獨幽穿林三徑冷出寺片雲浮簾捲吳
峯月水涵瀼井秋龍飛知已久佇看大江流

釣磯

在沙灣廻溪柳溪先生垂釣處

余見龍

邑人

銅崖高百尺一石踞寒波潭水清如此漁竿奈汝何昔人曾
坐釣隔世尙悲歌柳岍溪聲暮扁舟載月過

橫塘寺

汪

輒

邑人輦雲

嶺盡一塘橫山僧日自耕雲心孤寺老石骨冷泉鳴有鳥停
高木無人却世名斷橋延遠望寒逐夕陽行

涇灘

白日無停蓄江聲欲破隄浪飛生雨雪山吼出雲蜺舟落高
峯下人招古岸西平沙多宿鷺野樹一猿啼

留雪樓看秋

氣候茲辰變風吹昨夜秋水聲橫廣漢山色滿高樓天地煩
人意古今費客愁茫茫何可托萬里一鷗浮

登山臨水亭落成

邑令

萬友正

石磴盤空構此亭長江砥柱矗雲屏城連遠渚沙滌白水隔
芳洲樹繞青座上獨當風送善樽前更慰雨爲靈三山自有
神鰲載咫尺誰圖海上形

重新獅崖亭九秋公讌詩有引

邑令 石讚韶

獅崖觀音閣武邑關鍵也前令萬公作亭其上更植
檀柳東郊以培氣勢閣今二十餘載林木森然而亭
將就圯余葺而新之因九日宴集漫賦長句

琴鶴相隨憶勝遊新亭詩酒大江秋綠楊堤外青山寺紅葉
林邊白鷺洲喜得天工瞻氣象多緣人事繼風流高懷此日
憑欄客擬向雲霄結鳳樓

石鑊洞得雨

乙巳夏五月大旱祈禱未應與都閫張雲鶴廣文羅

啟華職員張居桂費生冠武徒步出郭數十里禱於

石鑊洞果沛甘霖因賦長句

四郊火熾若焚膏荒畝無從下桔槔曾矢怨咨猶已溺敢辭
跋涉任民勞靈岩信石祈今日錯壤生機藉此遭果爾雲霓
施德沛倉箱依舊樂陶陶

和石明府獅崖亭九秋公讌原韻

教諭 羅啟華

從來名勝紀芳遊賓主言歡九日秋檻外烟雲閒野渡閣中
圖畫點新洲偏宜柳筆凌霄齒最喜修波繞郭流遺愛甘棠
千載蔭長歌一曲共登樓

新楓寺

熊翰

皎皎泉中石波濤響萬岑秋聲不可聽禪悅故能深濕葉留
花影霜林冷梵音空山雲欲定遲我十年心

晚過馬岡峽寺

盛世麟邑人志京

窮秋霜欲墜木末一天寒地僻禪心靜山深鳥夢闌懶雲依古佛新月上層巒偶聽幽鐘發蒼然暮色殘

鼉鼓潭

潭空隱隱夜鳴鼉二十年來種稻禾莫怪海田多幻變紅顏白髮可如何

登獅崖

分宜教諭洪詔邑人鳳銜

江頭巨石逼層霄高閣嵯峨隱寂寥一葉扁舟天際遠數聲魚磬峽中遙臨秋野樹枝低亞映日波光影動搖環武皆山供指顧撥雲歸去路迢迢

玉清宮

盛朝麟邑人右梁

山僻元門靜石床滿綠苔桷椽藤欲合鐘磬鳥相猜曲澗疑雲護深籬對月開諸仙嘗集此早已出塵來

登獅崖分賦

最喜獅崖峭能清野客神石毛生晚翠山脚下平津梵刹更今古流雲遞故新人歸斜照裏想見碧嶙峋

黃婆洞

李斐邑人浴絃

危崖臨絕壑瀑雪瀉晴空魚泛一潭碧花留半嶺紅淺池流月出幽石與雲通獨坐晶簾外披襟對好風洞有流月池水晶簾

宿頭陀寺

余世紳邑人西塾

偶宿頭陀寺佛燈向晚紅半龕虛夜壑一榻冷秋風倦鳥歸林曲飛濤入岫東十年懷遠夢飄泊此山中

宿藍關寺

陳濤海昌蓮溪

鳥道層巒歷幾重北宗南頓與僧逢九枝燈照三千界萬朶

峰圍百八鐘旅舍掃除師郭泰濁醪引滿爲茅容招提饒有
伊蒲饌一頃山田自力農

志局月下呈楊水園盛熙堂二孝廉

邑歲貢

盧金鏡

秋水

天憐艾子國人繁豫章書兩度從茲役同心戒覆車山川圖
畫裏風雅嘯歌餘皎月深相照泐然一鑑虛

月下過看鶴亭

新亭月色枕流開蠟屐從容看幾回自覺千秋人在抱何知
一鶴夜飛來神仙偶作風騷語壇席應將僞體裁賸得閒身
恣詠眺誰云天地不憐才

賓陽岡旅夜述懷

銀漢空聞接鳳城閒身安用惜浮名山川有力生人好天地
無心與物平一日風騷千古在三更月露萬緣清良朋倘亦

懷秋水翹首堦墀聽雁鳴

中潢卽景

春入江村陰雨多山橫餘潤自嵯峨參天古木分青靄夾鏡
平池貯綠波沙岸烟搖漁艇出楊林風送客帆過離騷讀罷
還傾聽好鳥聲聲喚插禾

秋日過澧水望羅峰劍山有感

邑舉人楊光斗

水園

百尺羅峯面十年谷涵劍氣水涵天雲巢鶴夢松梢月鍊釜
泉鳴石上絃如此秋光留客趣不知山色爲誰妍建溪許我
結茅屋簑笠灘頭坐釣船

登柳山作

江干曉望翠雲臺萬疊芙蓉天際開石磴盤空橫樹杪竹林
人共鳥飛來

遊柳山寺

邑舉人 盛元績 蒼霖

野色兼秋淨，凭高望遠天。石龕飛燹火，崖樹接峰烟。半榻清鐘迥，疎籬夕照懸。斷碑題甲子，花落不知年。

過東郊馬守府墓

荒郊慘淡捲殘虹，數尺頽碑晚照中。父老掀鬚談往事，後生屈膝拜英風。山城此日妖氛淨，白寇當年血戰空。若使無讒功幸錄，不留遺恨泣孤忠。

九日同盛碧秋叙芳蒼霖登西城作

御史鄒玉藻奉新人

萬戶村烟合，登臨一望收。飛帆連屋角，匹練挂牆頭。岸闊天無際，花香菊有秋。山亭如可結，再訪魏公遊。

宋韓魏公訪葉頽言至武寧有

四望亭詩

過頭陀寺

余光廷 邑人

蘭若山腰在，天然世外幽。雲堆三徑雪，泉瀉一痕秋。密竹兼松老，疏鐘與梵流。佛燈長不滅，照破幾人愁。

石門寺

羅穆 邑人

蕭蕭古寺鎖空山，曾有真人宿此間。石齋雙厓如欲合，門通一徑未嘗關。平林月到生虛白，絕巘雲深結翠鬟。日暮禪堂僧入定，青峰鬱鬱水潺潺。

夜過破石潭

盧廷亮 邑人

片石留奇處，揚帆走二更。風迴星影亂，月上水痕明。岍火歸漁艇，江雲入雁聲。蒼茫尊酒意，獨坐與誰評。

靖公崖

橫控羣山勢，奇崖裂鬼工。路隨三峽轉，水劃一原通。雪瀑飛寒練，松濤送晚風。樵歌何處起，縹緲白雲中。

登觀風山

不辭山路險乘興到雲端野濶鴻聲遠風高日色寒羣峯爭
揖讓怪石自盤桓嵐翠兼村景偏宜入暮看

余鳴珂邑人讓麓

遊叢雲洞

深洞何年闢春從絕磴回水流青嶂合犬吠白雲開峭石如
人立飛泉瞰壁來板橋新月上遙望最高臺

石鏡寺

不假陶鎔力瑩然照古今石泉飛樹杪禪磬落山陰壁斷雲
常合庭空草自深我來心已遠小坐散幽襟

遊靖公菴

陳日新

廢刹藏幽壑山空石磴遐陰厓荒古佛流水蕩殘霞磬歇涼
風定禽飛落照斜爐烟知己斷門閉一籬花

柳山讀書臺

張廷試

白日最幽處書臺碧草新空山落舊葉逸井蕩游塵麋鹿從
雲遠牧樵向我親此間泉石好誰復問迷津

石鏡洞

熊鎮瀾邑人水冶

層巒疊翠蘊芙蓉仙洞林翳秘勝踪凹石澄淵疑鬼斧靈泉
飛瀑隱神蹤巖花半落幽箐冷鏡壁全歌古蘚封峽口年年
翻急浪溪山深處白雲濃

建溪

清暉延古道寂寞此經過空谷蘭香靜新田春水多寒烟通
碧澗遠岫泛微波獨立青松下蕭然發浩歌

遊水文壩

寒雲鎖曲竇窈窕若難窮應是神工幻乃由仙竅通晶簾終

不捲壁鯉自旋空人到崑深處冷然欲御風石壁有魚如鯉

遊靖公崖

余世蓀

嶒嶸聳雲端懸空瞰激湍當年曾設險無日不風寒怪石迎人立飛泉隔樹看捫蘿登絕巘莫令夕陽殘

觀音崖

一徑隨峯轉崎嶇未肯平危濤傾石壁絕壑隱秋聲磴窄猿爭度厓頽樹倒生披茸尋小竇烟火隔溪明

獅崖秋望

盛樵

獅崖一望萬山空石壁龍從瞰水中十里寒潭清落日千年古刹靜秋風暮鐘敲斷悲蟬響曉籟驚看墜葉紅多病自然愁寂寞不堪憔悴對飛蓬

太平山雜詠六首

千崑萬壑鎖雲關老鶴無驚夢亦閒延頸向誰獨嘹唳白雲明月滿空山鶴山

誰道神仙不可親天孫牛女亦憐人乘槎倘復通銀漢謾向君平去問津枯槎溪

碧潭西望石船流欲載雲旗作遠遊秋水那能通涸澤枯槎相對日悠悠石船山

採藥歸來只自燒石人長此避塵囂高明亭上秋風勁吹入寒巖更寂寥石人洞

石磴雲封屐齒籥少年却步老如何長途盡日人無限惟有三仙得此坡三仙坡

太平古木動參天樞社翻為匠石憐不見榔梅空悵望為尋義櫟復凄然義櫟

搗公雜詠有榔梅義櫟二詩余遍歷山間竟不可得訪諸
老人無有知者因詠義櫟以誌慨後之遊者其識之

劍山晚眺

張濱

千山凝暮靄眾鳥宿疎林時倚孤峯外遙聞劍水吟邨烟飛
岸遠牧笛入雲深颯爽秋風至悠然披素襟

登南山丁仙臺

余詠建昌人

南山巒嶂曉烟濃數畝荒苔鳥道通猿遊遊人啼絕壑雁來
塞北唳高風寒花半放頽垣外勝跡全歸斷草中獨倚危崖
多感慨夕陽斜照晚山紅

石燕洞和韻

吳云

石室多奇幻常留數尺天疎鐘滴夜雨桂子落香泉鶴夢洞
中雲猿啼月下烟漁歌時欸乃不見古人船

秋日遊柳山

葉雲

如此蔚藍天氣好半山烟樹半江風蕭蕭牧笛度林去遠勢
全收夕照中

梧榕溪

盛周

策杖臨溪水潏洄獨向西沿山分石險過澗合雲迷潭落魚
心善水流花影低九秋梧葉盡風雨夜淒淒

頭陀寺

盧宣梧

古寺荒涼斜照裏孤雲斷續暮林中山川到此生惆悵落盡
庭前一樹風

遊長墅原

余珮

峽口羣峰立危崖勢欲傾山腰屯雨氣石脚轉溪聲白晝風
常冷深林鳥自驚一登高絕處面面晚雲生

遊靖公菴

馬頸崖前徑少東，丈人峰外雨濛濛。豈無礪草參差綠，空有
岳花上下紅。石裂苔侵蝌蚪字，藤垂水入梵王宮。雲歸窈窕壑，
高林暗薄暮。猶聞遠岫風。

登觀風山

費 煌

危峯天半插，舉手捫雲端。萬里烟光薄，一山秋氣寒。風吹羣
木落，鳥亂夕陽殘。四野生新月，遊人興未闌。

試劍石

峭立河干勢獨尊，劃然中斷水雲屯。莓苔久沒銀釵脚，
山谷月雙清四字不可跡。剝落長流古劍痕，十里危濤春石罅。一鉤新月
照黃昏，至今英魄摧人膽。颯颯松風欲滿村。

遊羅崑

葉期緯

斜陽不到處，花蕊自然生。靈境誰能闢，神工獨此精。田空雲
欲定，水落雪飛聲。襟袖寒光透，悠然萬慮平。
崑中倒懸石
蓮數十木

訪靖上人廢址

余 桂

一逕盤雲脚，崎嶇越石岑。未窮山水奧，已入上人林。臺廢花
仍爛，泉寒草自深。涪翁歸去後，寂寞到而今。

魯溪洞

劉廷璋

巖壑最幽處，微茫一線通。輕雲流欲定，怪石半懸空。畦冷時
浮雪，幢翻自引風。仙潭深幾許，未即到崆峒。

天柱山晚眺

余 榜

一片殘陽落，紅霄出暮雲。秋蟬驚斷岸，獨鳥悵離羣。萬井烟
光薄，幾家燈火分。牛羊歸去好，浙浙野風聞。

石門洞

羅應權

雲日盤幽處悠然上翠微魚穿甕口出泉傍石門飛一徑通
危棧千巖靜落暉我來春正暮清賞自忘歸

看鶴橋

盧琳

徙倚仙橋上猶聞華表歌水流魂不定花落影常過好月江
頭滿秋風木末多幾回憑眺罷有夢入南柯

鶴溪月夜

盛詠

秋風吹客至皎月上東城聚首皆知已高歌感此生溪光常
不改鶴化竟無聲斗酒當良夜蕭然寄遠情

遊叢雲洞

余世蘓邑舉人

闕得厓中巷尋來一洞幽板橋連岸曲佛閣韻溪流石影參
差出崑光次第收從茲登眺去深與白雲遊

四望山

陳鏜寧州人

索寞孤興蹇此間殊豁然周遭團野色廣漠匝寒烟飛鳥晴
峰外疎林落照邊無涯識妙理我意欲逃禪

遊丁令威故居

柱頭留語意仙風城郭居民盡眼中人去千年忘甲子宅餘
五畝是丁公九臯清唳常聞鶴十丈流波尙卧虹邑有看鶴橋是丁仙
跡遺曾賦歸來無住著廣成安復坐崆峒

豫寧竹枝詞

孝廉夏之翰新建人

嶺上雲高天氣清農夫先盼立春晴今年耕較去年好聽得

三更犬吠聲諺云立春晴一日農夫不用力又以元日早犬吠為豐年之兆

窩絲雙縵戰袍長白面兒童齏粉香金釧聲中鶯語滑碧紗

窗外月如霜俗以上元節擲馬燈切後抹粉滿裝沿村過市唱碧紗應月如霜或友款以茶餌

深林喜鵲噪高枝阿妹低聲報姊知昨夜燈花重結蔬行人

應是到家時

遠人在外者聞喜鵲噪或燈花則家中相慶以為必至

夜雨濛濛倩插禾平疇一望曉風多如何秧馬倥傯日老稚

都謳情艷歌插禾時秧歌悠揚可聽然多男女相感之詞有欲易之以勤勞勸勉者卒不可奪習俗使然也

竹樹籠葱石徑斜春來處處放桃花遠山明滅望烟火風景

依稀似若耶山居者繞村種竹樹間以桃花紅欄綠蘚彌望如錦饒有佳致

溪山深處有精肴春日攜筐採蕨苗莫道野蔬容易得穿雲

踏遍古藤橋

大田卽事

盧永

一夜黃梅雨平疇物色奢數聲新布穀百畝舊桑麻浪風中急秧針水面斜東郊農務罷芳草亂鳴蛙

九日遊萬福寺

徐復

丹楓寒菊梵王秋策杖重來此地遊山色蕭條誰是主風霜

慘淡我登樓遙岑落木連雲暗斷岫殘虹和雨收莢酒僧齋

能醉客疎鐘幾杵暮烟流

石鏡山

張問達

造物開靈照瑩然託翠岑動涵烟雨意靜見地天心好鳥時窺影停雲欲送陰我來春正莫對此豁幽襟

遊獅厓

盛超

草堂竹徑度東城留此狡狴江上橫翠岫凝烟自揖讓危灘
趵雨空碎匄一帆風挂斜曛遠幾樹雲籠宿鳥鳴高閣終能
藏芥粒大千誰復定虛盈

石燕岳次韻

邑剛 盛翼 垂雲

幻意從茲秘淵然別有天小開初滴翠深入但聞泉雙乳宿
殘雪一門通遠烟月明洲渚上疑是泛仙船

豫寧城晚眺

盧 鼎

千山突兀繞山城柳岫吳峰入眼清楊浦草深孤岸綠
花發兩江橫寒潭月照山人宅謂鄭荒塚香留列女名謂戴氏婦
遙眺鄂王熾賊處森森古木與雲平

丁仙厓

王時淳

窮幽偶一到仙厓竹杖悠然稱雅懷石笋何年會剝落丹臺
遲我更摩揩猿如好客披蘿望鶴為搏風帶雨來記取入山
山路穩重遊恐為白雲乖

秋杪上九宮

洪 謙邑人穆懷

不盡登臨興依然九月天野蕎花散雪茅店雨籠烟問酒猶
稱菊添衣合用棉莫愁仙路遠雲繞最高巔

訪望江樓古蹟

盧廷麟

收取江流一望中溪園意興遠乘風周溪園詩有客當年詩乘風來縱酒
酒層雲峻此日樓臺返照空小草生春開綠野鶯聲出谷弄
青叢瓣香敬為先人祝安得嗣徽屬藐躬

石壁

余 介

巨石臨空谷飛泉挂碧蘿谿雲迷草徑牧笛逗村歌鳥帶新
烟遠風歸老樹多南山當戶牖春色正婆娑

高泉寺觀泉

副貢 洪 論

小徑通禪室流泉淨石渠霧深時澤豹波冷不生魚清入詩
人肺光分貝葉書一塵原弗染此處有真如

淨明堂晚眺

進士 盧庭琮興國人

一綫天開萬壑重水清石瘦白雲封何當落日銜山早偏自
催人下碧峯

讀邑侯鮑公定變略感賦

余廷楨

先公能殺賊鮑父果知兵濟變甘扶病攄忠苦奪情推誠鄉
勇力奮義馬侯營功烈終難掩昭如日月橫

看鶴橋月夜

欲從何處散幽襟獨立溪橋看露禽秋氣初澄風入夜水光
遙映月當心千年鶴語深相警七字詩盟信可尋學得神仙
重過此豈惟城郭繫謳吟

破石潭懷古

盧定洛

巨石臨江岸維舟落雁聲秋風人望遠夜月水痕明試劍留
仙蹟摩崖失舊名涪翁憑弔處先後共移情

秋日登武陵崖

不識登臨處誰曾到絕巔山容平揖讓水勢遠回旋古有桃

源客今無陸地仙徘徊崖石上萬里接風烟

薌田卽事

邑舉盛牧遠臯人

碧流無數繞薌田水勢微茫斷復連振羽鳥齊雲外樹披箕
人立雨中烟荒洲草滿侵蘭芷幽谷春寒咽杜鵑片片桃花
江岸落漁郎好泛木蘭船

上董源觀音閣

鳥道盤旋杖策艱奇厓兀立壯天關閣藏萬疊青峰下人在
千層翠色間入戶泉聲晴作雨當樓雲影水兼山尋幽最是
平生癖欲借禪房半榻閒

梅林村

山南山北萬株花一曲孤山處士家爲愛曉春乘雪月不臨
水處亦橫斜

按盛牧小村人買酒獨樹鳥歸巢鋤攜楊柳逕人隔豆花
籬等句風韻雅秀想見其人搜全稿不得可惜也

遊萬福寺

余鶴

躡屐遊山絕磴通
凌空誰插玉芙蓉
人離下界三千尺
屋結飛崖第一峯
烟島花開天女傷
石壇鳥散梵王鐘
登臨別有層樓在
獨倚朱欄看萬松

登觀風山

李趣堂

特起三峯上
森然列玉屏
河山開面目
吳楚接蒼冥
野樸風猶古
崑幽石有靈

山腋卽石鏡寺

使君如覽勝杖屐爲誰停

中村枕碧山

上有鄉勇七人墓

東來山勢駐中村
界斷平郊綠蔭屯
夾鏡水光涵晚翠
懸旌樹色隱朝暎
野驂鸞鶴仙踪去
壘蟲風雲戰骨存
長夏陰陰

歸正好阿誰一榻臥羲軒

遊淨明堂

余光策

不到幽深處
安知小洞天
道人雲際立
古鶴竹陰眠
繞檻花千个
在山水一泉得來皆妙理
何必愛逃禪

雲臺書屋故址

方瑗

書屋今何在
雲臺舊有名
山空啼鳥緩
木落帶烟輕
五老仍窺帙
三源可濯纓
故津誰肯問
重見古人情

傍有五老峯三卷源

三卷源春日

幽僻山村萬樹連
春來景物盡鮮妍
賣茶客渡迴風嶺
驅犢人耕活水田
茅舍東籬花壓屐
石橋南畔柳含烟
閒遊恍惚羲皇近
疑是桃源洞裏天

下泮竹枝詞

女伴招邀步水涯提筐共說采新茶夜來貯得烘籠滿處處
當爐製雪牙

一鎌腰挂度前坡薅麥收成計插禾待到雨餘塘水足桔槔
聲裏雜秧歌

日暮江船且罷橈布帆齊落泊灘腰羣呼貰取村中酒齊揭
龜壺過小橋

南渡新洲

邑歲貢 翁蘭 晚堂

南郭臨流處新洲影漸賒地靈橫伏曜水勢抱圓沙變化原
難測滄桑詎有涯看來消息好還應似蓮花

建昌蓮花洲有出狀元之識

魯溪洞

邑舉人 洪遇舉 澣青

古岸蒼烟迥長林返照低鷗任風上下石劈水東西好句凝
眸得青雲滿袖攜由來適意處多在此山溪

初夏雨後偶步西郊

盛楫

龍潭石刻半湮留雨洗江烟作此遊欲向蒼崕臨古篆且從
山寺上危樓晴光乍散高低塚爽氣新開遠近洲梅熟幾時
春尙邇歸途一曲興悠悠

晚過三賢墩

張鳳英

我愛林巒好三賢過化同水流深樹裏人立暮烟中小逕山
茶綠疎籬木槿紅瓣香情未已一曲企清風

遊蕪田慈善堂

蕭蕭古寺曉烟圍有客尋芳到翠微紫竹小村沽酒市綠楊
深渚釣魚磯春花爛熳當軒發野鳥參差逐隊飛此去雲臺
曾不遠

明進士方應里讀書處

何時下榻閉柴扉

尊經閣

盧表

開閣窮幽邈因思大雅存勢收山水勝名倚聖賢尊汲古非
無綆尋真故有源六經誰註脚好與細推論

登吳王峰

吳王名得擅高峰馬鬣荒唐是舊踪霸氣全消瓜圃在仙人
不見石芝封平臨秋色齊飛雁遠撫雲濤引怪松偶爾放懷
千尺上憑誰點綴萬芙蓉

過獅崖集杜

邑舉人洪崖象眉

所向無空闊

兵房曹胡馬

華亭入翠微

重題東亭

遠鷗浮水靜

春歸蒼隼

護巢歸

題鄭氏亭野

日荒荒白

漫成

悲風稍稍飛

秋笛

我行何到此水宿

永息漢陰機舟登

柳貞公祠

葉世春

崩男峰頭四望空等閒身與坐禪同書臺洗盡三秋雨古樹

吹殘一夜風石磴參差苔自鎖洞門冷落鳥常通昔人舊宅
今何在衰草寒烟返照中

過牛頭峽

王家猷

奇峰峭絕逼重關影落深潭勢一灣窄徑穿林人絡繹斜溪
促石水琤潺紅崖橫鎖妖氛淨鄉人嘗禦流賊于此紫鹿重來羽客還
兩岸烟嵐飛不定須臾回首失層山

上登高山殘塔

潘江邑人應一

巽峰修補列江干兩級浮屠一徑盤古篆臨摹苔色老孤城
指顧鏡光團鶴歸華表乘雲去鳳下東林振羽寒他日芙蓉
能削就豫寧應作畫圖看

武陵崖

余廷傑

百里芙蓉障東南半壁橫倚天連雁陣拔地聳猿聲水派三

源遠鄉關一望平仙津如可問不媿武陵名

登尊經閣

盧鳴玉

高閣憑欄望悠然景物呈野雲橫谷口山雨亂江聲丹刻前
嶽在步趨古道平千秋誠一意紹述費經營

遊柳山

芙蓉萬疊矗青天不是柳公亦不傳誰道後塵無住著盤空
直上踏飛烟

橫堂寺

葉當穢

亭亭古寺宿空山一路清風自往還蓮洞潛開香草徑燕岩
隱鎖白雲關池邊月影蟾光靜石上苔衣雀羽斑此外浮塵
都不染禪房花木日閑閑

遊橫堂寺

楊植

招提留勝跡秋晚此登臨水潤寒溪骨風疎古樹陰磬幽通
妙會岩老定禪心最是蓮花洞靈源深復深

遊永慶寺

副貢 盧翹拔

欹斜一徑夾幽篁寂寂招提午夢涼斷岸雲流詩入畫高簷
花落席飛香鷗臨埜渡浮春水人坐疎鐘到夕陽咫尺窮塵
污不得仙源何必訊漁郎

雨後遊南山

葉璉

芙蓉萬疊矗雲端林壑陰陰古逕盤人到崖巔秋雨過鳥飛
天際烈風搏幾峰奇石開新景兩澗清泉漾暮寒偶爾振衣
高絕處夕陽紅樹滿闌干

雲臺書屋故址

邢蔣

荒臺會結草堂靈伊昔朋來此閉扃倒瀑自瀦雙澗碧高雲

長峙五峰青風流前輩文壇在勝境阿誰蠟屐停剩欲誅茅
招好事塵緣一掃坐橫經

登東崖

羅其亨

邑人

豈是芙蓉嶂嶙嶙水際縣東南添半壁上下隔遙天山黛開
吳鏡江雲接楚烟馬公會禦寇設伏此崖邊

守府馬公設伏
獅子崖背禦白

頭兵事詳
見二公傳

遊南山

戴雲

屋結山南亦有年幾番登陟菊花天水流清影通茶灶風遞
幽香入酒筵古木半陰林壑靜危峰兀立斗牛懸夕陽過處
樵歌歇一帶邱墟起暮烟

頭陀寺

郡庠盧

丹

幻爐

長年眷戀此山阿荏苒韶光客裏過戶外千峯遙挂練堦前

一石半成坡荒臺已恨遺踪邈古殿依然老佛多別具禪心
參莫透幾回搔首盼嵯峨

登寒泉樓望荷花池

潘運璽

誰是誅茆者芳池入眼空秋山餘落照碧水臥殘虹酒醒鴛
鴦夢詩牽菡萏風登樓思往事相對意無窮

九日同友人集飲獅崖分賦

羅若春

飄殘秋色欲迎冬又是黃花一度穠攜杖行隨石磴曲新亭
高惹午雲封詩才漫說題糕手風景難追落帽踪不盡登山
臨水興斜暉試任掛寒松

觀音閣

上董源

邑庠

盧

晷

同堂

依崖成古閣別是洞中天徑曲迷樵路山深絕俗緣簾櫳飛
落葉花雨潤寒泉爲問住持者上方不記年

遊萬福寺

羅茗

百尺懸崖一望秋閒扶藤杖興悠悠烟消遠浦禪關迥雲宿
空山午磬幽遊屐豈緣參佛至清談還爲老僧留息機十二
危欄畔坐對長松人倚樓

暮經大橋河

邑庠 劉拭

日落峯峯帶斷霞馬蹄逕喜踏平沙林環碧蔭依山麓石駕
長虹臥水涯捲壑烟雲迷野色橫村燈火出人家一更蕭寺
鐘聲發歸路西邊有月華

魯溪洞

盛學光

石門初捲碧雲開與室斜穿曲曲來上下全歸新色相高低
盡結古樓臺誰揮粉筆傳神畫石紋朗見費出甫出四字任遣洪濤洗綠
苔每年洞水湧出一次土人相傳爲洗洞水咫尺龍潭深莫渡也從此處問津回

荷花池訪鄭山人故址

盧方晉

竹籬茅屋古詩人菡萏鴛鴦鳧遞故新池畔年年春草綠幾回
瞻眺倍傷神

同劉大開屏修大河橋落成

邑庠 夏日瑚 鳳岡

東來病涉已年年琢石成梁是夙緣春水乍張雲壘動彩虹
長駕鍊城堅居然灞岸堪乘馬底事桃源必泛船剩欲與君
吟杜牧玉簫何處月當天

悠然閣望南山

盧兆明 鎮南

危巒疊起勢崔嵬春滿芙蓉秀色堆翠柳遠同雲氣捲碧桃
遙共畫屏開曾聞仙子乘風去幾見伊人跨鶴回有客登臨
恣眺賞天懸一瀑檻中來

瓜源口偶拈

邑庠 舒鶴 慕吉

一帶烟村傍水居桃花峯外是吾廬竹町柳岬閒椽在謂汲古園

汲綆阿誰問秦初秦水村

汨汨源頭活水流居人曾此厯先憂破為家大人同領助老人捐築只今柴

氏洲前過雲暝風酣十里秋大注破

白板橋邊照碧虛良宵風月畫難如青帘匝圻閒桴繫逸事

輸他下瀨漁青碧灘

晚次梅林

盧兆鯨

一村茅屋小古木鬱清陰犬吠舟中客人歸渡口林水聲當

書臺山懷古

貢生張翼南龍溪

暮靜漁唱入烟深買酒誰家子可能共晚斟

先人前代此棲真官職泥沙有夙因水滙鹿崖清似鏡樹封

牛峽迥無塵溪山如許成佳話風月何當寄遠神日上書臺

頻弔古千秋猶見石嶙峋

登紫鹿嵯絕頂

真成抗俗仰垂厓破險來茲漫有懷遠水一灣回地軸奇峯

四面插天階直憑峭絕衣堪振無復風塵眼獨措後此若為

遊叢雲洞

盧志紱

飛閣臨嵯半藤陰一徑通橋危咽澗水磬響落松風峭壁嵐

光迥禪房世味空老僧留薄醉偈語白雲中

遊石燕崑步韻

楊載歌

鬼斧何年劈盤空啟洞天石溜穿古磴山雨激幽泉草蔭含

蘇潤崑深隱碧烟桃源應似此無復問歸船

艾城秋薦乾隆丙午

邑都張雲鶴蒲坂

匡廬面目仰童年幸際雲衢桂馥天滿座文章輝叔固一朝
鵬鳳破江煙軍門莫鄙無心膺醜酒還期獻薊燕高會鹿鳴
懷老馬西華葑菲亦蘭荃

宦遊修水賞名賢試看鵬程走萬千蔬酌雖慚冷署飲筆花
直燦玉堂箋敢居介冑存青眼聊鼓蛟龍起碧淵大斗長酣
休厭我衣冠瞬息五雲邊

東郊別意呈同學諸知己

刑部主事張華甫松邑人

一曲還山直至今而今又賦出山吟乘車已慰良朋願陟屺
難安母氏心千里朔雲茅店晚五更春雪板橋深何時再酌
獅崖酒徙倚天堦望遠岑

已上三詩舊志遺今補人

